





西江志卷第七十二

人物七

袁州府

漢

陳重字景公宜春人少與鄱陽雷義為友俱學魯詩顏氏春秋郡太守張雲舉重孝廉重以讓義雲不聽明年舉孝廉重與俱在郎署有同署郎負息錢數十萬貫責主日至重密以錢代還終不言惠又同舍郎有告歸寧者誤持隣舍郎綉去主疑重所取重不自申說市綉償之後寧喪者歸以綉還主其事乃顯後與義俱拜尚書郎義黜退重亦以事免復舉茂才除細陽令政有異化為司徒所辟拜侍御

史後漢書





按人物志陳重與雷義後皆不仕同隱居雞足山卒合葬今其地名陳雷里

晉

袁京宜春人不樂仕進隱居府城東北五里山時人因名袁

山郡守為立高士坊

林志

按元和郡縣志袁州以山得名而山又因人得名亦猶嚴子陵之於嚴州也不知人物志府志何以多失載

唐

彭雲宜春人自幼力學通陰陽圖緯隱居不求聞達玄宗遣使以蒲輪徵之至再始行命之官辭歸孫伉貞元間舉進

士

林志

韋無強宜春人隱居十五年不出戶郡守董禎欲表不求聞

達科固辭不就為立逍遙坊表之

同上

彭伉宜春人貞元間進士授石泉縣令歷官岳州錄事參軍

有政聲

府志

鄭史字惟直宜春人開成進士為易學博士積官永州刺史

有賦百篇又有詩十二首見宜陽集二子啓谷

人物志

盧肇字子發宜春人兒時見宜春令盧萼奇之曰子異日當有聞肇於是益力於學舉會昌三年鄉試入京獻書侍郎王起時起知貢舉遂擢進士第一授潼關防禦判官初肇之未舉也李德裕謫州長史殊遇肇後肇應進士德裕復入相見肇至曰吾喜為金榜得狀元矣遂魁天下雖受裕知絕無倚附久之使相盧商太尉裴休左僕射盧簡求先後奏辟從事稍遷著作郎除倉部員外郎充集賢院學士



持節歙州諸軍事肇於是觀日月之運察盈虛之理為海潮賦成上之詔褒諭宣付史館移鎮宣池二州遷吉州刺史卒所著有文標集子文秀咸通中進士為長安令有聲官至弘文館學士

豫章書

易重字鼎臣宜春人會昌中張濱榜進士第二會有詔覆試

黜濱以重代之官至大理評事著文千篇

安志

李潛字德隱宜春人會昌中舉進士其謝座主王起詩有文學宗師似秤平無私三用佐貞明之句蓋起三知貢舉也

唐詩紀事

黃頗字無頗宜春人韓愈為州刺史頗師之為文章與盧肇齊名素不相下頗鄉試高等而肇狀元及第會昌末頗亦舉進士為監察御史有文千篇行於世

唐摭言

素皓字退山宜春人博學工著述咸通進士任撫吉二州刺史有治聲龍紀元年自集賢殿圖書使出採訪圖書著碧池書三十卷自稱碧池處士

林志

鄭谷字守愚穎悟絕倫七歲能詩司空圖嘗與其父史同院見谷奇之拊其背曰當為一代風騷主光啓三年進士始為京兆府鄠縣尉後為拾遺補闕乾寧四年以都官郎中退居於仰山東莊之書堂以卒谷詩清婉明白為薛能李頻所稱僧齊已有詩名詠早梅云前村深雪裏昨夜數枝開谷曰數枝非早也未若一枝齊已不覺設拜士林呼為一字師谷始登第與許棠任濤張蟻李栖遠等十人同有聲謂之十哲而谷尤以吟詠顯有詩四百篇嘗從僖宗登三峰朝謁之暇寓止雲臺道舍自編其集曰雲臺編宜陽



集各三卷其鷓鴣詩尤工世號鄭鷓鴣人物志

唐廩萍鄉人乾寧元年登進士科官至祕書正字集正觀以

前文章為正觀新書三十卷全唐詩小序

按袁州舊有宋嘉定間志載唐人宋迪以下或有詩見於宜陽集及登第年甲互見於題名記者凡五十有七人今不具錄

盧邈肇族子唐末預湖南計偕舉進士獻迴文詩三百首官

至祕書省正字人物志

南唐

盧絳字晉卿宜春人自言唐中書舍人肇之後讀書略通大指喜論當世利病舉進士不中往來金陵丹陽間久之乃上書論事陳喬異之用為沿江巡檢募亡命習水戰宋師

來討以絳為凌波都虞候守秦淮水柵屢勝諸將忌其能

說後主遣出授潤州節度使劉澄出送降款絳率所部走

保宣州金陵陷絳獨不降謀南據閩中過歙州怒刺史龔

慎儀不出迎殺之而行太祖使絳弟襲招之至京師授冀

州團練使遇慎儀兄子穎於朝曰是殺我叔父者執至殿

陛訴冤詔屬吏樞密使曹彬言其才略可用願宥其死使

自効太祖曰是貌類侯霸榮何可留也斬於西市南唐書

王穀字虛中宜春人南唐初登第長於樂府有鴻門詞苦熱

行玉樹曲膾炙人口林志

李徵古萬載人篤學有詞藻登第後以樞密副使除本州刺

史離都日李主賜以內庫酒入宜春界每經一村必召

耆舊親知藉地飲酒盡歡而去到郡靜理壁立凜不可干



嘗以私財百萬代鄉人輸稅尋以事賜死

人物志

宋齊丘字子嵩萬載人父訥攝鎮南軍節度使推官守大理評事齊丘少孤好學善屬文兼習機變權詐之術豫章亂遂隨眾東下時李昇刺金陵延四方之士往依焉甚被親禮昇欲進用之為徐溫所惡以為殿直軍判官溫卒擢拜左司員外郎累遷諫議大夫兵部侍郎參議機密尋授洪州節度使璟襲位復召為相俄乞致仕出為浙西節度使表乞歸九華賜號九華先生封青陽公所著化書理訓各

十卷

南唐書

彭世昌字襲之宜春人謹身修行以名節自持楊行密據淮楚召為長史未幾謝病歸有豪猾子數百為羣劫之曰吾徒遭亂世未有所託今德足而智有餘莫若君請隸焉世

昌正色叱曰梁汴之間真人出矣不知命數而逞無窮之欲智者不為也敢辭復請又辭三請之不從設棘篲繫其上而焚之諸孫仕宦有聲

人物志

宋

劉式字叔度新喻人明春秋公穀之學唐末舉進士是時張洎主文衡獨放式一人太祖平江南羈旅入京歷鴻臚大理丞出監通州和豐倉入判三司都磨勘司時財賦充斥無所明辨式條其闕漏創主轄支收司奸吏畏服淳化中齋冊往諭三韓轉太常博士賜玉書法帖十六軸終刑部郎官子孫宦蹟各有傳見臨江府

人物志

按寰宇記宋初未置臨江軍時新喻尚屬袁劉應入袁州人物



易言字應之宜春人少任俠有口辯真宗朝蠻寇宜州邊帥不能制募辯士往說之言應召單騎往酋長迎待甚恭竟歸順休兵真宗嘉之賜以官後元昊擾邊近臣多薦言可任上見其老不欲遣行令赴流內銓任樞府司戶參軍

林志

李奇字子正宜春人任職方員外郎性慷慨不事產業悉以祖產分兄弟仍戒子孫不得追取既卒族人端以詩哭之有祖來產業分兄弟身後詩書遺子孫之句

人物志

易著明字晦之宜春人博學精於聲律累被鄉薦時人為之語曰宜春易著明擲地作金聲與石曼卿為詩友天禧間

賜三班奉職終於左班殿直

同上

李衢字叔達宜春人唐西平王晟裔孫大中祥符登第官至屯田員外郎嘗倅筠陽寬慈不擾後以子貴贈特進

同上

夏戾錫分宜人天禧進士衡州司理參軍稍遷吉州判官歷知南康興化軍皆以善政聞治平中轉朝奉郎都官屯田郎中致仕子公績元豐進士

林志

李士安字永和宜春人以特奏同學究出身為人不安喜怒累任州牧後請老得養生之術視聽不衰年九十七卒

人物志

李士燮字和甫初名梁登慶曆六年第為人剛正不撓嘗知郴州吏民畏愛未嘗見其笑容仕至職方郎中

同上

李觀士安從姪慶曆二年試南宮賦偶失韻主司嘉其策特奏名登第時方弱冠知清江縣事熙寧初為大官令尋言役法不便出倅括蒼元祐初監江州太平興國觀司馬温公為相以書召觀比至京温公已薨除虔州不就請監南



嶽廟以歸觀少好神仙嘗遇異人劉海蟾以得道自任而排斥釋氏卒年七十三 同上

朱彥博字元施萍鄉人嘉祐進士通判潁州秩滿上神宗皇帝書極言當世利害名對稱旨遷廣西江西運判歷知虔

號解三州及湖北憲副所至有聲 同上

彭持字知權分宜人少喜學西漢文為諸生時知軍州事張

顯稀簡接士求見者先令詩賦方得通士無敢進者持奮曰是謂秦無人矣因入謁顯令作日新之謂盛德賦藏器

待用詩皆立就張大稱賞貢入太學與臨江孔武仲齊名

擢進士甲科元豐間累遷司農丞出為監司號霹靂手終

江西提舉 林志

高漸字善時萍鄉人熙寧進士寧鄉尉論新法有行而未便

便而未盡善者凡十策調廣州錄事參軍建中靖國初再

疏請正元祐元符二后君妾之分崇寧初編管撫州列名

黨碑大觀二年預八寶赦與起居舍人黃庭堅等同時復

官 人物志

歐陽中立袁州人初試部郎上書言新法不便以司馬光門

人坐元祐黨籍廢卒弟子私謚節孝先生 同上

曹傳宜春人元符三年與弟藻子遷同登進士人名其堂曰

三桂傳官至朝請郎知常州藻宣教郎知益陽縣遷通直

郎知郴州兄子邁崇寧中進士積官中奉大夫廣西運判

直祕閣兼權安撫使 同上

彭俞字濟川宜春人少隱集雲峰學邃於易自號連山子紹

聖進士知溧陽縣理冤獄甚多監司連薦之稍遷至朝散



郎所著有循吏龜鑑十二卷文集二百卷

林志

沈莊可分宜人宣和進士知錢塘縣嗜菊庭植嘗數百本晚年退居益放情於菊後以九月九日死朱子哭之詩有正當地下修文日恰值人間落帽天之句

人物志

按朱子哭沈莊可七律全篇見人物志今考朱集失載

李格字承之萍鄉人幼孤力學雖執爨手不釋卷既長通五經目重瞳觀書五行俱下元符進士許翰薦於朝以作詩

諷新法被論下獄竟得直歷職州縣同官多憚之

同上

湯夢觀萍鄉人崇寧進士知循州時蠻寇劫掠旁郡恒相戒不犯夢觀境事聞朝廷嘉之除六路坑冶鑄錢提點

同上

邾元鼎字元之宜春人學問行誼為鄉里所推重數舉不第無嗣郡中達官出其門者每歲拜其墓

林志

蕭杞萬載人宣和進士學邃於易精大衍之數歷官通判廣

州軍州事有治聲稍遷至市舶提舉

人物志

鄭銓字應權宜春人學通六經宣和間兩貢上舍不偶棄歸

學者踵門日衆金人犯江西銓上書知州事王仲疑言時

事責其守城著排姦黨說極論崇寧人才之弊

同上

張瑄字子律宜春人少從學邾元鼎熟於典故歷官州縣以

才諳稱立朝靖重不苟守嘉興卒平居不事生產仕至二千石喪歸貧無廬其清約如此然勇於為義周人之急未

嘗以匱乏辭子嗣古紹熙進士歷起居舍人官至中奉大

夫直龍圖閣致仕嗣古有文名慶元以後凡郡邑紀述文

翰多出其手

同上

羅尚友字明善萍鄉人少負俊才登進士第授武昌軍節度



推官時中丞李常為帥每燕集必召尚友凡樂語詩詞皆即席成因目為席上才子同上

黃嘉萍鄉人靖康初太學生從陳東伏闕上書請誅蔡京及用李綱退詣開封責府尹王時雍曰初以尹獻熙豐十事將喜有為乃今奸邪如此時雍唯唯執政者見嘉輩論事曰諸公日止食國家二升米耳吾徒有愧多矣後終廉州司法參軍林志

歐陽椿字永年分宜人六一先生之族紹興進士主瑞金簿稍遷至道州判官改判臨江軍轉永州教授未老致仕蕭散林泉號宜林老人有自修集行於世同上

譚綺字德新萍鄉人少嘗學問稍長勇健過倫應募從康王使河北授承事郎及即位綺掌飛龍內殿一日間加十三

資官至團練使府志

潘修字文叔萍鄉人年十七領鄉舉入京獻書宰相張浚隆興初以累舉特奏名陳時務六事從參廣西軍事討平洞賊李楫又上言二廣通販鹽法事宜與當國者異竟格其賞不行致仕人物志

趙善堅字德固宗室家宜春乾道進士簽書婺州判官朱子為浙東常平使器之歲旱賑卹有條所全活甚多歷官皆有治聲林志

孟浩字養直宜春人乾道進士知武寧有聲王藺自豫章召參大政力薦之朝選國子監丞出知湖州與貴幸忤罷歸起為潼川路轉運判官尋以直祕閣提舉四川常平狷廉不妄取與強毅精敏洞見事情常以州判官攝臨江軍奉



西江志 卷之十二 九  
給一無所受

同上

按孟浩所著有龜技集

文彥直字益之萍鄉人性好學雖避寇山中猶誦讀不輟紹

興初以恩補漢陽軍事判官終淮陽軍節度推官

同上

羅長康字偉正宜春人進士歷官寺丞出知永州迎其父以

養因名州署之後堂曰戲綵待制胡寅記

人物志

夏執中宜春人成恭皇后弟補承信郎閣門祇候遷古武郎

閣門宣贊舍人累遷奉國軍節度使加少保初執中與其

微時妻至京宮人諷使出之擇配貴族執中弗為動他日

后親為言執中誦宋弘事以對后不能奪既貴始從師學

作大字頗工復善騎射高宗行慶壽禮近戚爭獻珍瓌執

中獨大書一人有慶萬壽無疆以獻嘗為館伴副使連射

皆中金人駭服孝宗聞其才將召用之謝曰異日無累陛

下保全足矣人以此益賢之

宋史

按夏執中之賢何減漢竇長君宋史無專傳附見成恭

皇后傳中今采錄

胡安之字叔器萍鄉人受業朱晦菴之門經史疑義多所著

述郡守程許葺南軒書院聘安之為諸生講說學者稱自

齋先生

林志

孫億字延齡分宜人由進士知吉州永新縣民歲市縑六萬

餘匹主外計者收帑錢以供他費給鹽以償縑直億發其

弊吉租歲收四十萬斛漕臣意在聚斂戒庾吏收什二以

充羨餘億拒臺命出納一用倉式卒余襄公靖為志墓

林志



孫汲字公善分宜人寄籍臨江應舉授朝散郎監司知其才  
檄權吉州吉素號煩劇汲居不越月境內稱治人物志

易充字正翁分宜人幼聰敏拔羣年十六七博通易書詩號  
三經處士教授鄉閭遠近從學者甚眾所著有中洲文集

林志

晏又字明榮宜春人風度秀整主趙崇灑家後崇灑逮繫又  
自請詣獄俱以庾死人物志

元

趙榮字榮甫分宜人由吏學發身仕至朝請大夫萍鄉州知  
州致仕子彥文以賢才徵知閩縣事同上

歐陽玄字原功號圭齋其先分宜人祖遷瀏陽玄魁湖廣鄉  
貢進士及第歷官翰林學士承旨封楚國公贈大司徒文

章道德師表當世所著有圭齋集同上

彭應雷字震卿分宜人延祐間舉儒士授南寧路判官稍遷

蘭谿州同知有清白聲擢知象州引年致仕林志

夏鎮字定遠宜春人以春秋登進士授茶陵州判官終奉訓

大夫學行端飭為文章簡嚴有法度學者多宗之同上

海牙字伯源高昌人祖為素州稅務大使遂為宜春人海牙

登至正進士授承事郎進賢縣達魯花赤興革利害茂著

廉勤飾公字新學舍為士民仰戴善屬文人物志

彭繼凱分宜人至正末歐普祥陷素州繼凱募義勇起豐樂

鄉迎戰大破之會安福義士素明東等亦引兵來賊退走

州遂反正乃下令禁殺掠修城池繕甲兵弔死恤孤民賴

以安迎舊守寶童歸嫉其功令刺客殺之明一統志



黃盅字子中萬載人受學於臨川吳澂澂以子妻之至正丁卯舉於鄉授龍泉縣學教諭澂嘗題其書堂曰大本虞集為之記

林志

按虞道園大本堂記以盅為宜春人

夏以忠字尚之宜春人宋信王夏協旅孫以春秋試大都路流寓科第二授翰林國史院編修官調國子助教遷太史院都事洪武元年明師克燕悉官其知名士以忠獨以老病辭詔許歸會遣使搜訪元史強之如江廣以忠辭不得命行至番禺卒太史金華蘇伯衡著文哀之

同上

明

劉迪簡宜春人學邃於易詩春秋吳元年徵入京授尚賓館副使陳時務五十條及進皇王大學通旨奉詔使交趾至

南寧道卒所著有尚賓集孫衢舉於鄉揚州府同知有政聲

人物志

劉仲質字文質分宜人洪武初為宜春春訓導被薦入京擢翰林典籍奉命校正春秋本末十五年拜禮部尚書帝以天下郡縣並建孔子廟而祀止京師典禮未備命仲質議之仲質乃與儒臣奏定釋奠禮儀頒行天下學校每歲春秋仲月通祀孔子如儀時國子學新成帝將行釋菜侍臣有言孔子雖聖人臣也禮宜一奠再拜帝曰孔子明道德以教後世其可以職位論耶今朕有天下敬禮百神于先師禮宜加尊崇乃命仲質詳議仲質請帝服皮弁執圭詣先師位前再拜獻爵又再拜退易服乃詣彝倫堂命講庶典禮隆重稱陛下之意詔曰可又立學規十二條合欽定九



西泠志 卷十一  
條頒賜師生是年冬改華蓋殿大學士帝親製誥文賜之  
坐事貶御史後以年老致仕為人厚重篤實博通經史文  
體典確不尚浮藻常當帝意焉 明史藁

劉澤民字朝佐宜春人邃於經術能詞章洪武元年以賢才  
舉授縉雲知縣有政聲民稱劉父陞嘉興府同知 林志

歐陽貞字元春分宜人從學士揭傒斯鄉進士夏鎮學工古  
文元季不仕洪武初以易經魁江西鄉試授考城主簿改  
扶溝以老歸所著有周易問辨三十卷史提鈎七十卷餘  
學初集龍江叢稿東齋寓錄貧樂集自號石戶農 人物志

簡迪字居易萍鄉人洪武初以明經舉充儒學訓導太守朱  
守仁以學行獨高薦陞本府教授至京試吏部優等除監  
察御史遇事敢言明年以疾致仕自號薌溪老人 同上

黃子澄名湜以字行分宜人洪武十八年舉會試第一進士  
及第授翰林編修進修撰伴讀東宮累官太常寺卿建文  
帝即位命子澄兼翰林學士與齊泰同倚任遂謀削諸王  
泰欲先燕子澄執不可曰周齊湘代岷諸王自太祖時多  
不法削之有名今欲問罪必先周周燕同母弟削周是剪  
燕手足也會有言周王橐不法者遂命曹國公李景隆往  
執之詞連代湘齊三王橐至廢為庶人幽代王桂於大同  
以兵圍湘王柏於荆柏自焚死執齊王橐囚之京師廢岷  
王榘為庶人周王之就執也下燕議其罪燕王上書申救  
帝覽書惻然謂事莫如且止子澄與泰力爭之未決出相  
語曰上婦人之仁耳今事勢如此安可不斷明日又入言  
曰周王已廢所慮獨燕耳不亟圖之使得漸為謀非計也



去燕他無足患矣帝猶豫曰朕即位未久連黜諸王若又削燕何以自解於天下時燕王已疑懼稱病以世子及兩郡王在京遂稱病篤乞三子歸燕泰即欲收之子澄曰不可若收三子則彼先發有名且得早為備不如遣歸示不疑乃可襲而取也竟遣歸已悔追之不及燕師起遂以誅泰子澄為名帝命耿炳文為大將帥師討燕炳文敗子澄薦李景隆及景隆屢敗召還子澄慟請正其罪帝不聽子澄拊膺曰大事去矣薦景隆誤國萬死不足贖罪燕師數勝解子澄官密令募兵於外子澄至蘇州與知府姚善倡議勤王京城破欲與善航海乞兵善不可乃就嘉興楊任謀舉事為人告俱被執子澄至成祖親詰問之抗辯不屈磔死年五十一族人無少長皆斬姍黨戍邊一子變姓名

為田經遇赦家湖廣咸寧正德中進士黃表其後云 明史

藁

按福王時贈子澄禮部尚書謚節愍又朱孟震集載子澄有後一條云靖難初子澄攜四子及一孕妾逃崑山追捕甚急有太守某者召諸子謀令長子隨父就逮而三子改姓田孕妾復生一子公死難後太守求其尸葬蘇之馬鞍嶺紀事於石納墓中有貴官欲奪其地訟之官遣司理某勘之至墓所震雷一聲挈碑石而出始知為公墓司理具牲醴設奠貴官媿而止今田氏代有顯者隆慶中妾之子孫始歸分宜云

龍鐔字德剛萬載人年十九選入南宮曹國李文忠司成宋訥遇以國士薦知高皇帝召對稱旨命同隨春坊官入直



講悉民間田里稼穡陳古今孝弟文學諸史數年詔治水於泰州視軍遼東川雲所經利弊當興革者悉以聞帝嘉其能特授浙江按察使歲浣饑俸贖悉捐濟各郡以不避權貴為忌者所中遷長洲知縣歸侍養歲餘適晉府恭王薨世子幼起為晉府左長史靖難師起北平檄徵晉兵鐔泣固拒之文皇引兵至城下力攻不克竟趨金陵入正大統械鐔下錦衣獄不屈死焉年僅四十

人物志

黃伯奇分宜人姿性純篤好禮尚義洪武中才行老成舉授金華知府莅政嚴謹吏服其能

明一統志

嚴孟衡字衡中分宜人永樂進士授監察御史屢疏大臣不法有司憚其風采陞浙江副使莅任前一夕胥吏不戒於火案牘燬在事皆夤緣規避衡自引辜受罰運磚逾年有

白其枉者赦復職時法網稍密衡悉心平反一牘中至理冤濫數十人屢遷至四川右布政使凡三年卒於官

人物志

劉蓋字迪誠萬載人永樂進士授給事中詔巡撫湖廣表循良黜貪墨綽有風采以論事忤旨調通州判官尋復為給事中言愈切直謫嚴州府經歷卒

同上

易節字時中萬載人永樂進士授行人歷禮部員外郎宣德間知成都府陞貴州左布政使有惠政夷人化服卒於官

明一統志

郭瑾字邦器萬載人永樂進士歷刑科都給事中特進刑部右侍郎以論中官忤旨出知潯州府未幾復原官轉左侍郎懇辭歸卒年八十三

人物志



李瓊字蘊素萬載人宣德乙卯舉人仕高安縣訓導歷詹事府校書進汀州知府首建學校決訟如神吏無侵漁時上杭寇至躬詣撫降民安之 同上

羅紳字尚訓宜春人宣德末年貢先任鹽亭知縣復任廣東石康縣流賊陷城父子三人死節立忠孝祠 同上

袁魯訓字宗道宜春人唐碧池先生之裔成化進士授東陽令蒲鞭不事又補蒙城擢行人司正時汪直輩專橫魯訓雅志解組適同年羅一峯以論李賢見謫遂歎曰直道不容如此哉遂棄官歸慕五柳之風植六柳以自娛號六柳居士 同上

袁慶祥宜春人以貢入太學待選吏部上疏言賞賜過濫所出不償所入又論刑部尚書董方身不執法而折辱屬官

以自厲又言正本澄源宜從學校曹監親民之職宜慎簡縣令黜衰老以息貪汙宜用夏埴張元禎高明羅倫以從士望書奏詔杖之東華門 同上

按袁慶祥林志失載時雩都有同姓名者成化朝亦入太學上疏被杖別有傳

蕭義字宜之宜春人成化進士授吏部稽勲主事卒義操履端方問學典實文詞雅暢袁士多師之 同上

按蕭義所著有葵菴集

歐陽汶字伯魯分宜人以經明行修舉授開封府學訓導改永康不受士贖師範嚴整進國子學錄嘗疏論時事遷周府長史改伊府致仕 林志

郭紳字廷章宜春人成化進士授寧海知縣侍講方孝孺縣



人也事淹國禁紳至首刻方正學集創祠祀之擢監察御史歷官南京刑部右侍郎卒紳器宇凝重雖歷崇顯而居鄉待人寬厚簡樸有長者風子叙正德進士歷貴州參議

人物志

高琬字德資宜春人成化進士歷知松陽上海二縣治行第

一擢南御史歷官浙江布政使撫治鄖陽河南襄漢盜起琬同都御史彭澤討平之璽書獎勵謝病歸卒年八十有

五

安志

張鳳字應時宜春人成化進士授江浦知縣歷長樂內黃皆有政聲累陞廣西參政時土夷為亂至則斬其渠魁撫循其衆地方以寧轉南京太僕少卿尋陞南京僉都御史提督操江改巡撫蘇松三河盜起齊魯騷繹河運不寧進右

副都御史巡撫山東兼理河道事平致仕卒於家

林志

龍士通字允升萬載舉人任長汀知縣長汀地饒而俗黠士

通冰檠自矢供具日止腐菜家僮三人見其清苦遂逸其

二高御史葑按閩風力嚴峻特薦之遷彰德府同知

府志

李香字汝蘭分宜人正德進士初授工部主事抽分徐州轉

刑部尋擢廣東兵備綏靖蠻寇歷陞四川巡撫大理正卿

引疾致仕歸清恬端莊宦轍所經靡不服其公廉居家敦

尚孝友捐橐贍族修葺學宮子慶餘亦篤孝友

人物志

彭鳳號夢瀑分宜人嘉靖進士選庶吉士授編修冊封岷藩

却諸餽遺甲辰會試充同考官同里時相欲徇所私鳳峻

拒不納撒棘後有撫拾科場之弊者波及鳳竟用罷歸家

居寓情山水以著述為事敦行孝弟嘗引呂氏藍田約參



酌成篇西岡彭氏家法遂冠一邑時相敗鳳冤始白所著  
有逸休堂稿 徐學詩逸休堂彙序

易鸞字和鳴五歲能詩正德十五年奉文建黃太常忠臣祠  
鸞願以己地立祠助修嘉靖癸未進士授和州知州下車  
手較權量使民畫一時有易公稱斗之號陞刑部郎子弘  
器嘉靖丙午鄉試第一家居清澹博古善文未仕卒 人物志

何偁字邦美宜春人嘉靖進士授舒城令擢兵部主事改御  
史巡按蘇松一意激揚微行出訪大吏憚其丰采入掌計  
典公平不阿林居十載執政復以書起辭曰吾守吾舊不  
能降心以從人也郡中有大利病侃侃陳說里人德之 府志

楊以誠字明夫宜春人嘉靖進士授行人擢御史巡陝西茶  
馬嚴絕吏弊復巡按廣東彈劾不職賊吏望風解綬者十  
餘人以遭謗歸里 同上

朱良佐字守忠萬載人嘉靖進士授淮安推官擢兵科歷戶  
科都給事彈壓不避權貴如正中宮通海運肅閣監停翫  
作載大政記中陞大理右少卿謝病歸 人物志

宋希堯字叔中分宜人萬曆進士時江陵不丁母憂鄒元標  
以進士特疏叅劾希堯亦侃侃持論其子宜奔喪故為所  
忌授刑部未幾稱病歸越歲出補工部營繕司卒 同上

簡繼芳號慶源萍鄉人負資異敏年十三與童子試邑令楊  
自治見而奇之稱為崑山片玉遂補諸生家貧篤學萬曆  
進士歷官雲南副使所至稱廉謹以老告歸 府志



陳巽言字汝說宜春舉人教諭宜興陞上杭知縣清敕端重  
不阿當路轉維摩知州告養生平孝友廉靜寡慾學以性  
命為宗 同上

張璧字世良萬載人萬曆進士授南兵部主事歷武庫司郎  
中值營兵缺餉脫中譟呼璧單騎擒首亂卒以鎮定遷廣  
西僉事巡左江却關門例數千金定交南黎莫二氏構殺  
之亂轉右江參議改雲南參議分守金滄條議罷大理採  
石省麗江額解金值歲饑斗米錢三百臺司議以米代杖  
每就禁多斃璧歎曰吾寧違新法以一官易多命下令悉  
除之全活三百餘人嗣謝病歸 人物志

趙錦 人安貧嗜學嫻於詩賦著有草堂集行世子濂弱  
冠選貢授石埭令累遷惠州郡丞所至有善政事親以孝

聞撫姪如子好引進後學邑人稱為東谷先生年九十五  
卒 同上

羅彝號性菴萍鄉人父喪廬墓三年註孝經萬曆初詣京上  
書給賜深衣大帶與鄒南臯劉瀘瀟闡明理學江右皆仰  
宗焉 同上

彭士遠字利見分宜人萬曆舉人初授廣西賓州知州移河  
池州州素患土孽士遠廉得其渠魁地方寧謐尋遷鳳陽  
同知以河功加俸 府志

彭自新字滌之萬載人萬曆進士授行人陞刑部郎中出守  
四川重慶府陞本省副使歷陞雲南參政時雲龍逆首段  
進忠謀襲奪官擁兵叛自新計誘擒勦殲渠散脅迤西以  
平遷本省按察使以疾致仕歸自新初為大行即抗疏請



元子冠婚大典一時重其丰采

人物志

朱志字元遠宜春人少負才名以貢選入太學舉順天辛卯鄉試任瀏陽令子壻來省一飯即令歸甫三月以不阿鑛璫棄官歸子六人俱以文學顯光裕光祺先後鄉薦光祺字賚賢端謹嚴重遭郡多故祺條議戰守激揚忠義上書

潯督語極憤切後教授萬山中疾革正襟而卒

同上

宋九儀字夔卿萬載人由恩選授建寧知縣尚文學課農桑禁女巫戒溺女廣倉儲歲凶捐俸積穀邑人曰宋公倉士民愛慕為立生祠九儀取其木主以歸曰吾不務虛名也入覲力請終養事親以孝聞林居三十餘年吟咏自娛有和淵明六詠以見志年八十一終

同上

袁軾字欽禮宜春人年十四失父下帷力學補博士弟子試

輒高等入闈不遇毅然曰泉石可甘箴笋可嗜奚區區為

日課子以程朱之學與里中講鄉約訓民行學者稱為東

泉先生年七十有二以子業泗貴贈漳州府知府

同上

嚴堯日號用汲分宜舉人任泰和學博文水鄒元標倡會講學獨折節於嚴鄒起總憲招為幕屬力辭復署汾西卒孫

一晁順治辛卯鄉薦

府志

袁業泗字景源軾子萬曆進士知樂清縣改蘭谿丁父憂再補龍溪所至著循良績擢南京兵部主事進員外郎中特疏請撤湖口稅璫李道遂罷其權江上下千里稱便知漳州府漳故多盜業泗梳櫛綢繆俾無震擾士民親附歲饑發倉賑之又勸民出粟分遣諸吏乞糴潮陽諸隣郡以濟不給全活數千人陞福建副使念母年八十餘乞養家居



西江志 卷十一  
崇禎改元名補廣西副使分守左江遷廣東參政分守嶺東平九連山賊地介惠潮兩郡多反側肇置連平州所部以寧徵為南京鴻臚寺卿再疏乞骸歸以疾卒子繼梓康熙甲辰進士 人物志

吳三益號受立萍鄉人萬曆進士授大理評事由寺正出守邵武尋改徽州所至以敏練著聲晚年林居與修郡乘 府志

張承詔號篤棊分宜人萬曆進士授蘇州推官遷禮部主事擢戶科轉工科都給事中果決敢言歷陞南刑部左右侍郎署尚書以會審事忤旨閑住 同上

彭大科號媿名分宜人萬曆丁酉舉人初知漢川縣縣有河名劉家隔者巨鎮也商賈絡繹歲額派商稅八百金協濟

潞府癸丑河關舟楫不通而稅仍歲徵隔民苦之大科力為陳請得罷其稅撫按交薦調知廬江有惠政陞北城兵馬司時逆璫魏忠賢用事大科獨守正不阿左遷景東同知璫敗擢工部主事監督陵工以病請告 人物志

嚴雲京號志印分宜人萬曆乙卯鄉薦知平原縣以城守著績陞兵馬指揮召對授御史巡按河南兼監軍時汴圍越月京疾趨受事促諸鎮左良玉劉澤清許定國等進兵援汴圍稍解未幾賊復合值霖雨彌月平地成川賊決河灌城城沒而汴圍獲解會上別遣監軍來代乃歸 府志

索一鳳號鳴岐宜春人萬曆進士初任工部主事陞虞衡員外郎中曉暢吏事善治繁劇逆璫廉其能有意鈎致之一鳳持不為動守西安清介自持未幾遷浙江副使時海塘



崩潰奉旨估費十五萬金一鳳身任其役用四萬金而工  
成歷楚藩臬卒於官

人物志

鍾炘字叔憲分宜人天啓進士授中書歷禮科都給事中續  
密不妄言嘗以素賦浮重又遼餉加派煩多約諸紳在朝  
者疏請豁減卒以部議格未盡行識者恨焉累官左都御  
史以會審事秉筆忤旨革職回籍林居十餘年卒

府志

黃希憲原名金貴字雙南分宜人天啓進士知順德縣擢御  
史巡按甘肅遷太僕少卿應天巡撫三吳漕白二糧累民  
已久希憲力為請命海寇王尚忠蹂躪崇明各村落希憲  
殲渠散脅吳松悉平晉秩河道總督兼兵工二部侍郎乙  
酉江左姦黨誣以河工冒餉下詔獄會喪亂出亡遇盜殺  
於江上

人物志

袁繼咸字臨侯宜春人天啓進士授行人擢御史遷主客員  
外郎擢山西提學僉事孑身赴任改湖廣參議賊首呂瘦  
子作亂討平之黃州賊老回回革裏眼等七大部犯黃陂  
黃岡繼咸馳救賊引退與黃岡知縣徐調元築城六千餘  
丈一月而竣移淮揚督鹽鑄二秩調用督師楊嗣昌引參  
軍事廷推右僉都御史撫治鄖陽以襄陽失陷被逮遣戍  
貴州已而廷臣交薦起故官總理河北屯政未赴會賊逼  
江西廷議設重臣總督江西湖廣應天安慶軍務乃命繼  
咸兵部右侍郎兼右僉都御史以行時聞賊已陷武昌左  
良玉擁兵東下人情洶洶繼咸遇之於蕪湖激以忠義良  
玉還復武昌而朝議忽以呂大器來代命繼咸仍督屯政  
大器與良玉不相能長沙袁州俱陷疆事益迫廷議復推



西江志 卷十一  
繼咸代之甫抵鎮京師陷福王立繼咸入朝密奏曰左良玉雖無異圖然所部多降將羣心危疑意外不可不慮臣當星馳回鎮臨行復陳致治守邦大計引宋高宗用黃潛善汪伯彥事時相馬士英以爲譏已也凡所陳奏及題用文武官悉被停寢羣小皆不喜繼咸遂謂繼咸與良玉倡和脅制朝廷適留都有僞太子下獄之案良玉疏爭不納與士英輩有隙繼咸疏言太子真僞非臣所能懸揣真則望行良玉言僞則不妨從容審處多名東宮舊臣辨識以解中外之疑疏未達而良玉反且將馳檄以清君側爲名矣初繼咸聞李自成兵敗南奔恐其由岳州犯長沙入江西境命部將郝效忠等守九江而自統副將汪碩畫李自元等援索州已登舟忽聞良玉反復旋九江良玉舟抵北

岸貽書言願握手一別九江士民泣請繼咸往紓一方難遂與監紀余有灝會良玉於舟中良玉言及太子下獄事大哭次日移舟南岸繼咸慮良玉且來破城復往諭之良玉袖出皇太子密諭劫諸將盟繼咸正色詰以密諭從何來良玉語塞約不入城且改檄爲疏駐軍候旨繼咸歸集諸將城樓灑淚曰兵諫非正晉陽之甲春秋所惡可與同亂乎方計拒守而效忠及部將張世勳等顧與良玉合兵遂劫掠城中婦女財物繼咸欲自盡副將李士春密白繼咸隱忍到前途王文成之事可圖也繼咸以爲然出城面責良玉良玉疾已篤望見城中火光大哭曰予負素公嘔血數升是夜死其子夢庚祕不發喪諸將推爲帥急移舟東留都皆疑繼咸同反而繼咸所上書率不得達乃書衣



帶以死自誓會

大兵已下江寧繼咸勸夢庚旋師不聽效忠乃給繼咸赴其軍云入南昌為後圖繼咸信之將及湖口夢庚效忠納款於

大清遂遣將執之北上明年三月堅不肯降見殺

明史藁

素一鰲字占梅宜春人萬曆乙酉舉人授江山知縣調邵陽入為南大理評事陞刑部主事員外郎審決河南擢寶慶守吏民畏服喜獎拔士類以忤岷藩解綬歸卒

府志

朱允恭字君培分宜人萬曆戊午鄉試授望江知縣臺司交薦時淮海彫殘允恭以循良高等遷守海州焦勞拮据地方稍有起色會忤當事去任允恭早失父而貧事母純孝弟方五歲撫育至老不衰凡所入不以自私入

國朝丁亥奇荒雖日不再食猶簡敝衣鬻于市以周親族之貧者其好義如此

人物志

按府志載有郭彥恕者事繼母以孝聞隣人鬻妻贍母貸以貲完其夫婦不詳何縣人附錄於此

劉映洙字崑懸宜春人少浮湛諸生間氣豪宕崇禎壬午舉春秋鄉試第一後棄家學浮屠誅茅瀏醴深山以終

同上

張兆蘭字以綺分宜人性豪逸強記能文崇禎辛巳選貢廷試唱名禮部諸生皆踧伏兆蘭獨長揖宗伯奇之入太學鄉試報罷歸癸未冬憤獻賊陷袁偽署官屬糾眾謀殺偽知縣龍方捷恢復邑城事覺為所執殺之萬年橋上

同上

張問明字日章分宜人以明經任魏縣值寇殘隣邑抄掠城下單騎撫諭以治河著功時督府盧嘉其能署參永平軍



西江志 卷七十一  
戊寅己卯間大水丁亥奇荒煮粥施米全活甚衆司理王  
延禔題其廬曰德門遺老云 同上

國朝

陳之龍號去亢宜春人天啓鄉舉爲人明敏英達有文武才  
初任常德司理歷守乾州同知西安聲望大著入

本朝歷任巡撫廬鳳淮揚後以疾歸 安志

張自烈字爾公宜春人博物洽聞著有四書大全辨諸家辨  
古今文辨正字通十餘種行世累徵不就晚卜居廬山年

七十七卒無嗣南康太守廖文英重其品詣葬於白鹿洞

山外之鄭家沖書其碑曰清故處士張芑山墓 同上

楊嘉禎宜春人郡庠生順治丙戌春兵亂父文盛避兵山堂  
兵將至嘉禎從間道渡水報父水急被溺流至深處猶躍

出水面曰速走速走遂溺死

西江志卷第七十二



西江志卷第七十三

人物八

臨江府

漢

孔恂字巨卿新淦人爲州別駕車制舊有屏星如刺史車式  
 刺史行部發傳晏移怒欲撤別駕屏星恂曰使君傳自晚  
 發欲撤屏星毀國舊制別駕可去屏星不可撤即投傳去  
 刺史追謝乃止 林志

晉

留京臨江郡人孝行推於鄉里時江水暴漲居民皆漂溺京  
 負其母號泣忽有大龜至其前舉家七口俱上龜背行十  
 許里及一高岸遂失龜 豫章書引九江記



西江志 卷十三  
按晉時未有臨江郡名留京事林志不載今補入

唐

魯季文清江人貞元間廬父母墓江水遠不可汲忽一虎於廬側跑地得泉人以為孝感名其坊曰虎泉今為孝感坊

云林志

楊彥伯字鼎臣新淦人大順間擢童子科昭宗親試之彥伯應對詳雅上曰劉晏之徒也以詩賜之後為安福令州以異狀聞賜緋魚歷官門下侍郎

同上

南唐

曾文照新淦人七歲應南唐童子科擢第三李氏歸宋為亳州永城令上疏論邑利害免挽船夫力歲以萬計遷蒙城蝗不入境終大理司直

林志

按文照人物志作文昭同一人也林志兩處重見於吉安曰文昭於臨江曰文照今刪彼而存此昭之與照究未詳孰是

鄧佑弟佶新淦人佑擢南唐童子科佶登三禮科鄉人易其鄉曰揚名里曰雙秀

同上

按明嘉靖五年始分新淦之峽江鎮置縣南唐時初無峽江縣也人物志謂曾鄧皆峽江人今改定後倣此

宋

孫冕新淦人雍熙進士與王欽若友善欽若為相不為薦天禧末冕守蘇州欽若出鎮餘杭檣舟吳門佯醉謂冕曰兄淹遲日久當別置委曲冕正色拒之欽若愧謝後謝郡歸九華山名竟不起

林志



按孫冕林志於吉安臨江兩處重見今刪彼存此

曾乾度字順承文照子淳化進士兩任推官三典州縣未艾

乞祠起知筠州竟謝事歸

同上

王欽若字定國臨江軍新喻人淳化進士為亳州防禦推官遷太常丞召試學士院以右正言知制誥拜左諫議大夫參知政事景德初加大學士遷尚書左丞真宗封禪泰山以欽若為經度制置使又為天書儀仗副使擢吏部尚書天禧元年上玉帝尊號尋拜左僕射兼中書門下同平章事出判杭州踰年進司空除山南東道節度使分司南京仁宗即位復拜司空進司徒封冀國公卒於位謚文穆

宋史

按王欽若歷相兩朝絕無可紀之蹟林志豫章書俱登

諸人物傳今據宋史止存其官秩無事更加貶辭矣

李諮字仲詢臨江軍新喻人幼而父出其母日夕泣涕求母還乃至絕葷茹鄉里稱其孝舉進士累擢知制誥權三司使建言天下賦入有常而用度日滋願一切裁抑之又以商人入粟邊郡筭茶與犀象為虛實三估坐耗官帑請以實錢參紐由是怨謗滋起遂出知洪州徙知永興軍境內肅然累官知樞密院事時權茶法寢壞復用諮所變法而官無濫費諮性明達周知世務在樞府號為稱職卒贈右僕射謚憲成

東都事略

按諮林志豫章書俱作咨今從史

蕭律字調元新喻人景德二年賜明法及第為廣州司法民有犯銅論及流死者百餘人律以狀聞罪止於杖守汀州



以西江志 卷之十三  
以屬邑上杭多嵐瘴奏遷縣治於平曠之地仕者免客死  
徙潤州以江道紆回風濤為患開直道通舟歲省淘河工  
五萬璽書褒諭累官金部員外郎 林志

蕭諤新喻人以詩易二經教授鄉里尤篤於訓子其後四子  
博學有名皆登第 同上

丁雋字德偉新喻人通春秋時號丁三傳事親至孝篤宗族  
五世聚居總麻以上親踰二百口均愛如一大中祥符間  
旌其門 同上

宋玘字子美新淦人以鄉貢至京師夜夢一僧語曰公才高  
當擢第惜壽不永若速還可延翌日即幡然南歸不復進  
取人推為鄉先生三孔皆出其門與王介甫唱和名見臨  
川集中 同上

劉立之字斯立式子大中祥符進士為連江尉累官湖北路  
轉運使坐事免起漣水軍會西南蠻獠叛諸路請益兵上  
問立之因備言可蓄不可捕狀卒如其議尋遷益州路轉  
運使子敞放為時名臣 同上

蕭賀字慶之諤長子咸平進士屢官御史負直聲臺有樗木  
或曰樗凡材宜易柏賀曰道有不直官惟其人作宥樗賦  
終職方員外 人物志

蕭貫字貫之諤仲子與弟賁同登大中祥符第仁宗初官太  
常丞出知洪饒二州時有撫州參軍孫齊者出其妻杜氏  
娶周氏入蜀復納娼陳氏并挈周所生子之官未幾周亦  
至齊怒手刃其子周訴州及轉運皆不受理或告之曰訴  
洪州蕭使君白矣周乃馳告撫非貫所部特檄治之雖更



西漢志 卷一十三  
赦猶論齊編管遷兵部員外郎召試知制誥卒有文集二十卷

林志

楊申字宣卿新喻人天聖進士乙科上饒丞入為太常少卿遷光祿卿正色立朝與王安石論新法不合出知濟州多善政監司皆新進申以舊人崎嶇不樂仕遂乞歸呂大防表所居為耆德坊

同上

陸起新淦人慶曆進士為英州真陽令有巫以銀瓮貯二蛇自嶺北至真陽誘民迎且祠焉觀者填路起聞驟至蛇所亟令出瓮斬之捕巫劾其姦遠近稱為神明仕至員外郎

人物志

劉敞字遼父臨江人舉進士甲科通判蔡州召試還直集賢院判尚書考功仁宗賜夏竦謚曰文正敞言竦之行邪而

謚之以正不應法疏三上仁宗為更竦謚同修起居注尋遷右正言知制誥奉使契丹素知山川道里遼人歎其博物使還求知揚州徙鄆州糾察在京刑獄嘉祐四年祿享羣臣上尊號敞言非古仁宗然之請外知永興軍召還翰林治平中判太常丞改集賢院學士判西京留司御史臺卒年五十敞為人明白俊偉博學自信自六經諸子百氏下至傳記小說無所不通為文敏贍在西掖時一日追封皇子公主九人敞將下直為之立馬却坐一揮九制文詞典雅各得其體在長安得先秦古器數十愛其款識文字奇古因以考知三代制度與先儒所說不同者所著春秋傳權衡說例意林總四十卷文集六十卷弟子記五卷七經小傳五卷弟放子奉世

東都事畧



西江志 卷之十三  
按歐陽公所撰墓志以敞為吉州臨江人宋史以為袁州臨江人考臨江軍建於宋淳化三年領清江新喻新淦三縣寰宇記所未及載此時新喻尚隸袁州新淦尚隸吉州其後乃分二州之地置臨江軍故袁吉得並稱臨江也又按敞所著名公是先生集

劉敞字貢父與兄敞同學遂偕中進士調江陰簿為國子監直講趙槩薦敞可備文館召試優等熙寧初知太常禮院神宗手詔推求太祖諸孫屬行尊者為王以奉太祖後敞曰禮諸侯不得祖天子太祖傳天下於太宗繼體之君皆太祖子孫不當別為太祖置後臣以謂太祖子唯德昭德芳二人宜從其後世世勿降爵宗廟祭祀使之在位則陛下褒揚藝祖休顯著明矣考試開封府進士程文有用小

畜字者王介謂犯神宗嫌名敞曰此六畜之畜亦嫌名也因紛爭御史劾之遂出通判泰州代還為集賢校理判登聞鼓院三司戶部判官知曹州曹素多盜朝廷立重法而盜不息敞曰民不畏死柰何以死懼之至則尚寬平務在不撓視官屬如子姪歲中盜賊衰息召為開封府判官元豐初出為京東轉運使罷知兗州徙亳州元祐初召為祕書少監以疾求補外召拜中書舍人卒年六十七所著文集暨五代春秋內傳國語經史新議東漢刊誤詩話錄芳藥譜漢官儀凡百卷 同上

按敞所著名公非先生集

蕭映字仲景新喻人天聖進士筮仕吉水威惠並行邑大治每歲輸詣郡皆泝流而上映請築倉近郭以便輸將後知



道州終屯田郎中

林志

蕭固字幹臣新喻人天聖進士授太常博士通判虔州諸邑剽劫固授成美不踰月誅縛殆盡璽書獎諭改知桂州兼廣西轉運使時儂智高侵邕州廷議皆欲進討固知智高凶狡預陳羈縻之策於樞府不果用後智高果叛人服其識交州貢麒麟固力諫却之累官集賢殿修撰

人物志

歐陽賓字國華新喻人五經出身宜黃尉時盜夜殺人舟中無所掠而去賓疑之呼死者妻詰之色動乃姦夫也捕寘於法再遷虔州左司理多所平反四遷為比部員外郎通

判饒州

林志

孔延之字長源新淦人孔子四十六世孫慶曆進士九遷至司封郎中平生與周敦頤友善在廣西寬恤民力舊賦糴

於民歲至六百萬石程督與租稅等延之計歲糴二十萬而足欽廉雷三州蠶戶為富人所役延之奪使自為業者六百家皆著定令改荆湖北路提點刑獄罷鼎州六寨戍兵千餘人諸子並以文章顯世號臨江三孔

人物志

胡向清江人皇祐進士自袁州司理歷審刑院詳議權大理卿決獄仁恕所至無冤嘗倅越州奏課為天下第一

同上

陳公琰字易卿新淦人皇祐初擢第知醴陵縣時朝廷變鹽法吏緣為姦上疏蠲除之八遷至諫議大夫七十致仕

同上

傅燮字志康清江人嘉祐進士熙寧中由幕府累遷少府少監專劇郡所至有聲尤博學藏書萬卷皆手自校勘年八十好學不衰

林志



蕭注字巖夫新喻人由進士攝番禺令儂智高圍廣州注突圍出募壯士得二千人連舶乘風縱火焚賊舟破之智高走大理擒其母與二弟募敢死士入大理智高已死函首歸獻擢禮賓副使廣南駐舶都監知邕州尋貶鎮南節度副使會有訟注功者起右監門將軍邠州都監熙寧初交人挫於占城衆不滿萬時謂可取以注知桂州將圖招徠之策會遣沈起代之罷歸卒于道 同上

孔文仲字經父臨江軍新淦人也少刻苦問學號博洽舉進士又舉賢良方正名試對策極論新法之害不為王安石所喜黜不用哲宗即位為校書郎遷禮部員外郎有建議皇族惟楊王荆王得稱皇叔餘疏屬當各係其祖若唐人稱諸王孫之比文仲曰上新即位宜廣敦睦之義不當疏

間骨肉議遂寢擢起居舍人拜左諫議大夫論青苗免役之法為首困天下論保甲保馬茶鹽之法為遺螿留蠹遷中書舍人卒年五十文仲學識高遠天資狷介寡言笑少所合有文集五十卷弟武仲平仲 東都事略

謝舉廉字民師新喻人少與弟世充從父懋叔岐同學元豐八年叔姪兄弟連第時號四謝以儷三孔舉廉宰南康有善政尤工於詩所著有藍溪集 林志

何正臣字君表新淦人九歲舉童子賜出身復中進士第元豐中蔡確薦為御史裏行遂與李定舒亶論蘇軾得五品服領三班院會御史兼六察正臣言幸得備言路以激濁揚清為職不宜兼治他曹神宗善之悉罷御史兼局而正臣解三班加集賢院擢侍御史除寶文閣待制尚書省建



為吏部侍郎出知潭州時詔州縣聽民以家貲易鹽吏推行失指正臣條上其弊遂寢之民以為便後知宣州卒宋史

按何正臣入臺初因蔡確之薦其人可知矣林志載入臨江人物傳削去其與臺獄一案今據史傳補錄瑜瑕自不可掩也

蕭從字從義新喻人元豐進士分宜令遷宗學博士權御史臺主簿蔡京欲處以六察使排異已者從謝不能乞郡除河南少尹擢陝西運判卒林志

劉奉世字仲馮元祐初擢起居郎詔冊乾順為夏國主以奉世使西夏遷天章閣待制樞密都承旨除吏部侍郎權戶部尚書以樞密直學士僉書樞密院事罷為端明殿學士

知成德軍坐元祐黨責光祿少卿再貶隰州團練副使郴州安置後移居道州徙光州復端明殿學士知定州又知鄭州以言者落職提舉崇福宮以舊職致仕東都事略

孔武仲字常父舉進士為禮部第一元祐初為祕書省正字遷著作郎論科舉之弊詆三經新義請復詩賦取士遷國子司業侍講邇英數月拜中書舍人直學士院時議祠北郊久不決武仲請用純陰之月親祠如神州地祇遷禮部侍郎出知洪州移宣州坐元祐黨奪職居池州卒所著詩書論語說金革講義內外制雜文共百餘卷同上

孔平仲字毅父舉進士元祐中入館選即出為京西路提點刑獄坐黨籍謫知韶州又責惠州別駕英州安置徙單州團練副使饒州居住徽宗即位召還為戶部員外郎遷金



部郎中出使陝西帥鄜延環慶奉祠而卒平仲有史學著  
續世說行於世 同上

胡靜字應侯向之子磊落有大志讀兵書應武舉試祕閣為  
第一從西師入夏界修羅九城破賊於賞逋嶺勇冠三軍  
以功加閣門祇候累遷秦州東路蕃漢巡檢 林志

陳竑字君度新淦人元祐進士鎮安軍節度使推官郡頻年  
患水因條陳全城隄決溝澮等事會詔釐正祀典竑悉毀  
淫祠又常率同僚瘞枯骨之無歸以籍沒產給寓喪於佛  
祠者兄弟三人以父蔭敘相遜自取科第終以直氣不撓  
罷 人物志

郭奉世字少馮新淦人元祐進士羅田令改知永新有異政  
泰和民素苦令詣漕司乞更奉世永新之民遮留不可乃

寓兩界兼理之山東盜起擢知密州破巨盜張海等數萬  
五遷至徽猷閣待制移守襲慶金兵再至有旨以徐兗兵  
赴關和議成退保宿毫移軍于濟謝事歸里 林志

李大有字仲謙新喻人紹聖進士累擢中書門下省檢校公  
事權給事中守虔州宣和末金人犯京詔諸道勤王大  
有募義勇五千人入援後守三衢有寇猖獗下車即平 同上

謝磐字安國累舉廷對高宗作損齋磐言未能損者八有司  
以言訐置第二時稱八損狀元 人物志

李邈字彥思臨江軍清江人以父任為太廟齋郎用薦擢提  
轄環慶路糧草通判河間府以忤蔡京童貫換右列為遼  
國賀正副使還以上書言契丹不可滅免官久之進都大  
提舉京西汴河隄岸改知嚴州代還貫欲以西師入燕邈



復語貫曰方臘小醜一呼屠七州四十餘縣竭數路之力而後能平之殆天以此警公也何可遽移之北乎因密教貫陰佐契丹以圖金人貫不能用乃乞致仕貫收復燕山奏邈知涿州改易州皆辭不赴嘆曰禍自茲始矣金人犯京師詔趣入見既至上言种師道宿將有重名二敵所畏朝廷自主和議而盡以諸道兵畀師道視敵為進退將在軍中君命有所不受使見可擊而進勝固社稷之福不勝亦足使敵知吾將帥有以國為任者上稱善而耿南仲方主和議不合乃以邈為京城西壁守禦使邈言姚平仲敗績而敵猶不敢留是畏我也不以种師道再戰已失機會尚可尾其行及河半渡擊之猶足為後戒議復格三上章致仕不允權樞密副都承旨出為河北西路制置使守真

定拜青州觀察使仍知府事金人至邈乞師於宣撫副使劉韜且間道走蠟書上聞皆不報城被圍且戰且守相持四旬城破邈巷戰不克將赴井左右持之不得入幹離不火燎其鬚眉及兩髀亦不顧乃拘於燕山府金人命邈被髮左衽邈憤詆毀甚力金人搯其口猶吮血喫之翼日自去髮為浮屠遂遇害將死顏色不變南向再拜端坐就戮贈招化軍節度使謚曰忠壯

宋史

胡洵直字次魚新喻人宣和間以貢入京著中興策二十五篇後舉進士累官湖南提刑司幹官深於詩凡子史靡不

涉獵有蘭谷集十卷

林志

蕭建功字懋德新淦人嘗從陳了翁壻遊壻器重之時李朴謫歸貧不能自給建功為築室居之朴死以女妻其子義



聲日著李綱薦其操行累官知衡州刻思賢堂法帖三十  
卷 人物志

按宋時未有峽江縣人物志以建功爲峽江人者訛今  
據林志改正

向子諲字伯恭臨江人欽聖皇后從姪也補承奉郎宣和初  
除江淮發運主管文字有欲濬河與江淮平者子諲言河  
高江淮數丈而欲濬之使平決不可曩有司三日一啓閘  
復作堰儲水故水不乏比年行直達之法啓閉無節堰閘  
率不存今復故制嚴禁約則無患使者用其言漕復通進  
秩一等爲京畿轉運副使尋兼發運副使金人犯亳州子  
諲以書遺金人言兵勢逆順令退保河外金人遽以亳州  
等州守禦所牒報之約日索戰諸道兵畏縮不進時康王

次濟州子諲遣進士李植獻金帛及本司錢穀之在濟州  
者以助軍費張邦昌僭位使其甥劉達賫手書來子諲不  
啓封焚之械繫達於獄遷直龍圖閣江淮發運副使以素  
爲李綱所善故黃潛善斥之起復知潭州金人破江西移  
兵湖南子諲聞警報率軍民死守金人圍八日登城縱火  
子諲率官吏奪南楚門遁坐敵至失守落職賈收言子諲  
督兵巷戰又收潰卒復入治事帝亦以子諲與他守臣望  
風遁者殊科詔復職移鄂州主管荆湖東路安撫司劇盜  
曹成據攸縣子諲軍於安仁單騎入賊中諭以國家威靈  
成不服執子諲歸會馬廣遣人持吳敏檄諭成成許受招  
始釋子諲詔提舉江州太平觀起知廣州尋移江州改江  
東轉運使徙兩浙路都轉運使除戶部侍郎以徽猷閣直



學士知平江府金使議和將入境子諲不肯拜金詔上章  
言自古人主屈已和我未聞甚於此時宜却勿受忤秦檜  
意乃致仕退閔十五年號所居曰薌林卒年六十八 宋史  
胡聖隆字藏之於書無不讀恥爲王氏學不事舉業自號瀟  
灘居士賢士大夫樂與遊政和初以白衣上封事召未及  
對而卒 林志

蕭燧字照鄰臨江軍人紹興進士授平江府觀察推官時秦  
檜當國其親黨密告燧秋試必主文漕臺燧詰其故曰丞  
相有子就舉欲以屬公燧怒曰初仕敢欺心耶檜懷之調  
靜江府察推而歸孝宗初除諸王宮教授累遷至國子司  
業進起居郎先是察官闕朝論多屬燧以未歷郡縣遂出  
知嚴州嚴地狹財匱始至官鋸不滿二千燧儉以足用二

年之間積至十五萬以其羨補積逋諸色皆寬移知婺州  
父老遮道幾不得行婺與嚴隣人熟知條教不勞而治除  
吏部右選侍郎旋兼國子祭酒除權刑部尚書充金使館  
伴十年兼權吏部尚書高宗山陵充按行使除參知政事  
尋充永思陵禮儀使權知樞密院以年及自陳除資政殿  
學士提舉洞霄宮卒年七十七謚正肅子逵淳熙進士唱  
名第四累官至太常 宋史

向浯字子源子諲仲子常從胡五峯遊端重有父風倅邵陽  
未幾即挂冠歸 林志

按向浯人物志作悟今從林志

謝諤字昌國臨江軍新喻人紹興進士調夷陵縣主簿未上  
撫之樂安多盜監司檄諤攝尉條二十策大要使其徒相



糾而以信賞隨之羣盜果解散金渝盟諸軍往來境上選  
行縣事有治聲改吉州錄事參軍歲大侵饑民萬餘求廩  
官吏罔措諤植五色旗分部給糶頃刻而定知袁州分宜  
縣縣積負于郡數十萬歲常賦外又征緡錢二萬餘諤乃  
疏其弊於諸監司請免之以憂去服闋除幹辦行在諸司  
糧料院尋擢監察御史奏減袁州分宜秀州華亭月椿錢  
諤里居時創義役法編為一書至是上之詔行其法於諸  
路民以為便光宗登極獻十箴又論二節三近所當節者  
曰宴飲曰妄費所當近者曰執政大臣曰舊學名儒曰經  
筵列職除御史中丞權工部尚書請祠以煥章閣直學士  
提舉太平興國宮而歸卒年七十四贈通議大夫諤為文  
倣歐陽修曾鞏初居縣南之竹坡名其燕坐曰良齋人稱

良齋先生

宋史

按謝諤所著有聖學淵源錄五卷孝史五十卷良齋集  
十卷經解二十卷講義三卷諫垣奏議五卷

羅裳新喻人母病篤裳私誓剔肝以救母刃刺入胸腹輒摧  
鋒取爐灰傅之血立止復籲天曰如母疾不愈當易刃既  
而母病少差後竟平復陳秉聞而賢之為作里孝傳

林志

按新喻有歐陽環者闔郡稱孝大觀三年進士林志不  
載附錄於此

張仲友世家新淦元祐末父早喪事母至孝人呼為張孝子  
鄉先生宋玘為作傳劉次莊書於戲魚堂

同上

歐陽元量字宏中新喻人少有遠志與弟昌邦入青原山著  
決勝兵要經進於上時傳零通信兩宮奏元量與俱假從



事郎以行使還自寧鄉令轉陽山紹興間有盜結獠為  
暴元量率三鄉民兵屯富連巖佛寺盜夜劫寺與戰不利  
被殺人物志

歐陽邦昌字德升靖康間在太學張邦昌僭號或勸避諱邦  
昌曰吾知有國諱耳遂辭歸後以恩科終永淳令同上

孔括字端中新淦人父叔三人曰源曰淑曰滋相繼登第鄉  
里亦號三孔括乃淑之子嘗令淳安廉介市號美醞曰淳  
安清時以此况之名聞行在所高宗題殿柱曰吏師孔括  
歲滿百姓留之上諭宰相曰可轉一官令再任終濠州守  
同上

劉龜年字且老新喻人放曾孫蔭從仕郎峽州司戶叅軍改  
錢塘簿累遷道州軍事判官守李南壽言于後守曰判官

賢不求人知恐君或失之也改宣教郎通判沅州蠻人侵  
掠無寧歲龜年按法立約恩信不爽遂帖服後乞祠階以  
歸同上

董良史字邦直新淦人紹興二年鄉薦第一判洪州時江西  
運判張常先嘗憾帥臣張安道陷諸遷客冀得良史證其  
事持不可移俸鄱陽秦檜當國任常先為鷹犬莫敢有忤  
其意者良史卒不阿論者偉之同上

鄒惇禮字和仲新淦人紹興二年中湖南北第一授宜春法  
曹開軒種竹以自娛善書得顏柳法人皆寶藏之所著有  
北窗集同上

李維芑字仲彰清江人紹興中知新城縣以愛民為本民之  
利病纖悉洞究省徭役興學校以儒術飭吏事民立祠祀



劉清之字子澄臨江人受業于兄靖之紹興進士調萬安縣丞時江右大侵郡檄視旱徒步阡陌親與民接凡所蠲除具得其實州議減常平米直清之曰此惠不過三十里內耳外鄉遠民勢豈能來老幼疾患之人必有餒死者乃請均境內之地爲八俾有粟者分賑其鄉官爲之主規畫防閑民甚賴之詣吏部銓知宜黃縣丞相周必大薦之召對首論民困兵驕大臣退託小臣苟媮又言用人四事一曰辨賢否二曰正名實三曰使材能四曰聽換授改太常寺主簿通判鄂州改衡州先是郡飾厨傳以事常平刑獄二使者月一會集互致折餽清之歎曰此何時也與其取諸民孰若裁諸公吾之所以事上官者豈以酒食財貨爲勤

哉至之日兵無糧官無俸上供送使無可備已而郡計漸裕民力稍蘇嘗作諭民書一編詞意質直簡而易從念士風未振每因月講復具酒肴以燕諸生相與輸情論學來者日衆增築臨蒸精舍居之作朱陵道院祠張九齡韓愈寇準周敦頤胡安國於左祠晉死節太守劉翼宋死節內史王應之於右部使者以清之不能媚已誣以勞民用財論罷歸築槐陰精舍以處來學者光宗即位起知袁州而清之疾作猶貽書執政論國事周必大來視疾謂曰子澄其澄慮清之氣息已微云無慮可澄遂卒初清之旣舉進士欲應博學宏詞科及見朱熹盡取所習焚之慨然志於義理之學所著有曾子內外雜篇訓蒙新書外書戒子通錄墨莊總錄祭儀時令書續說苑文集農書

宋史



按史傳清之字子澄又朱子集中與子澄往還尺牘唱和詩篇甚多林志不加詳考訛以為字子儀

章穎字茂獻臨江軍人以兼經中鄉薦孝宗嗣服穎為萬言書附驛以聞禮部奏名第一調道州教授作周敦頤祠會宜章寇亂郡僚相繼引去穎獨留寇平郡守奏穎有協贊之功召對除太學錄初任郎召對者自穎始遷太常博士光宗初遷左司諫屢疏請上問安重華宮寧宗即位除侍御史尋權兵部侍郎韓侂胥用事穎侍經幃上曰諫官有言及趙汝愚者卿等謂何同列謾無可否穎奏言天地變遷人情危疑加以敵人嫚侮國勢未安未可容易進退大臣願降詔宣諭汝愚無聽其去不報羣御史劾穎阿黨罷太學生周端朝等六人伏闕辨汝愚被誣且謂章穎言發

於忠端朝等皆被罪自是黨論遂起矣侂胥誅除集英殿修撰遷刑部侍郎尋陞禮部尚書丐去奉祠卒年七十八

贈光祿大夫謚文肅

宋史

彭龜年字子壽臨江軍清江人七歲而孤及長得程氏易讀之至忘寢食乾道進士授袁州宜春尉吉州安福丞除太學博士遷國子監丞改司農寺丞進祕書郎兼嘉王府直講光宗嘗親郊值暴風雨感疾久之疾平猶疑畏不朝重華宮龜年以書譙趙汝愚且上疏言壽皇之事高宗備極子道此陛下所親覩也况壽皇今日止有陛下一人聖心拳拳不言可知特遇過宮日分陛下或遲其行則壽皇不容不降免到宮之旨其心非不願陛下之來自古人君處骨肉之間多不與外臣謀而與小人謀之所以交鬪日深



疑隙日大臣所憂者外無韓琦富弼呂誨司馬光之臣而  
小人之中已有任守忠者在焉惟陛下裁察居亡何光宗  
朝重華都人懽悅尋除起居舍人述祖宗之法為內治聖  
鑑以進他日龜年又奏臣所居之官以記注人君言動為  
職車駕不過宮問安如此書者又數十矣恐非所以示後  
有旨幸玉津園龜年奏不奉三宮而獨出宴遊非禮也屬  
上視朝龜年不離班位伏地叩額久不已血漬鬢鬢光宗  
曰素知卿忠直欲何言龜年奏今日無大於不過官光宗  
曰須用去光宗崩寧宗受禪是夕召對寧宗感額云前但  
聞建儲之義豈知遽踐大位龜年奏此乃宗祏所係陛下  
安得辭尋除侍講遷吏部侍郎兼侍讀龜年知事勢將變  
會暴風震雷因極陳小人竊權號令不時之弊遣充金國

弔祭接送伴使初朱熹與龜年約共論韓侂胄之奸會龜  
年護客熹以上疏見絀龜年聞之附奏云始臣約熹同論  
此事今熹既罷臣宜併斥不報迨歸見侂胄用事權勢重  
於宰相于是條數其奸尋以煥章閣待制知江陵府湖北  
安撫使丐祠以呂棐言落職追三官勒停嘉泰元年復元  
官以待制寶謨閣致仕卒所著書有經解祭儀五致錄奏  
議外制侂胄誅林大中樓鑰皆白其忠詔贈寶謨閣直學  
士賜謚忠肅

宋史

徐夢莘字商老臨江人紹興進士為南安軍教授改知湘陰  
縣會湖南帥括田號增耕稅他邑奉令惟謹夢莘獨謂邑  
無新田租稅無從出尋主管廣西轉運司文字時朝廷議  
易二廣鹽法遣廣西安撫司幹官朝廷直與東西漕臣集



議於境夢莘從行謂廣西阻山正當仍官般法則害不及  
民廣東諸郡並江或可容客販未宜遽以二廣概行議與  
廷直不合夢莘既知賓州猶以前議為梗法罷去十三年  
二廣商賈毀業民苦無鹽復從官般法矣夢莘恬於榮進  
每念生於靖康之亂思究見顛末乃網羅舊聞會萃同異  
為三朝北盟會編三百五十卷自政和七年海上之盟訖  
紹興三十一年完顏亮之斃上下四十五年凡曰敕曰制  
誥詔國書書疏奏議記序碑志登載靡遺帝聞而嘉之擢  
直祕閣平生多所著有集補會錄讀書記志集醫錄集仙  
錄皆以儒學冠之卒年八十二弟得之從子天麟得之字  
思叔淳熙進士部使者以廉吏薦以通直郎致仕安貧樂  
分不貪不躁著左氏國紀史記年紀作具敝篋筆略鼓吹

詞柳江志天麟字仲祥開禧進士調撫州教授歷湖廣總  
領所幹辦公事臨安府教授武學博士輪對言人主當持  
心以敬通判惠潭二州權英德府所至有惠政著西漢會  
要七十卷東漢會要四十卷漢兵本末一卷西漢地理疏  
六卷山經三十卷

宋史

楊獬字正伯新喻人父沒盡以田園遜其兄紹興進士吉水  
令歲饑亟發常平粟賑之累官司農少卿以直顯謨閣知  
明州會海寇劫掠獬捕擒之海道平改知寧國卒子直清  
字叔裕永新令邑多強宗直清不為撓竟中飛語按驗無  
狀改知平陽

人物志

張紱字子儀清江人紹興進士主澧陽簿為政廉勤綽有特  
譽調衡州錄事參軍改宜春丞為人孝友自衡扶櫬歸值



秋旱舟不能前禱神江忽暴漲衡人異之 林志

按張紱洽之父所著有愚谷集十五卷歷代史年表二十卷洽宋史自有傳

劉荀字子卿清江人嘗從胡寅於新州又從張九成於南安凡有得二公緒言皆筆之名曰思問記淳熙中知餘干縣未滿適周必大入相以荀為首薦改判德安知盱眙軍所著有政規四十卷 人物志

按林志劉荀所著政規之外尚有明本三卷座右記三卷文源八卷痴兒錄五卷德安守禦三卷都梁記問八卷邊防指掌圖三卷南北聘使錄三卷

楊愿字謹仲申之曾孫銳志於學鄉之後進多出其門年四十方登第官車輅院上章乞歸人稱壽岡先生為文典雅

不尚艱深所著有壽岡集八卷 林志

嚴世父字亨父新喻人隱居不仕師事朱子有疑義問答往復書帖今祠學宮 同上

按嚴世父人物志不載考朱子集中與嚴時亨問答三條小注中有世文二字竊疑世文乃時亨之名林志訛文為父并訛以時亨為亨父耳俟再考

楊扶字圖南新淦人性方介不苟合判袁州以爭訟事忤郡將拂衣去官不復起自號竹溪居士胡忠簡周益公皆與之遊築室曰秀野忠簡為之記 人物志

向士虎字伯虎子諲孫七歲時聞祖誦陶靖節詩竦聽若有所得及登仕果無宦情授茂名尉及瓜代不忍去親側志不復仕丞相周必大以隱逸薦不就適意賦詩每有物外



之趣自號桂隱散人有桂隱集

林志

彭鉉龜年次子以父澤錄用嘗為寧都幹辦累知贛州捐逋賦二十萬擢直寶謨閣湖南漕所著臨川可否錄備寇議

事錄

同上

李仲發新淦人幼孤事二母俱孝生母侯氏病革仲發割股肉手熟以進母啜之愈有橘產於庭二本合幹楊萬里為扁堂曰橘瑞良齋謝諤記之侯氏沒誠齋題其墓曰李孝子生母侯孺人墓

縣志

按李仲發林志訛入元臨江府志承其繆所敘橘瑞事亦與此小異今從新淦縣志

曾三復字無玷臨江人乾道進士淳熙末為主管官告院遷太府寺簿歷將作太府丞紹熙初出知池州改常州召拜

監察御史進起居舍人兼權刑部侍郎以疾告老詔守本官職致仕三復性耿介恥奔競故位不速進在臺餘兩年持論不隨不激其沒也士論惜之

宋史

按曾三復人物志以為峽江人者訛今據史傳

曾三聘字無逸臨江新淦人乾道進士調贛州司戶參軍累遷軍器監主簿有旨造划車弩三聘謂划車弩六人挽之而箭之所及止二百六十步今所用克敵弓較之工費不及十之三一一人挽之而射可及三百六十步利害曉然乃不果造光宗不朝重華宮中外疑懼三聘以書抵丞相留正正未及言會以它事不合求去三聘謂凡今闕庭之內父子夫婦之際羣臣莫敢深言者避嫌遠罪耳丞相身退計決言之何嫌乎帝欲幸玉津園三聘上疏言今人心既



西江志 卷之十三 三  
離大亂將作小大之臣震怖請命而陛下安意肆志而弗聞知萬一敵人謀知馳一介之使問安北宮不知何以答之孝宗病革復上疏言道路流言洶洶日甚臣恐不幸而有狂夫姦人託忠憤以行詐假曲直以動衆至此而後悔之則恐無及矣帝意為動及孝宗崩帝疾不能執喪朝論益震洶三聘謂今日事勢莫若建儲寧宗立兼考功郎後知郢州會韓侂胄為相指三聘為故相趙汝愚腹心坐追兩官久之復元官侂胄誅諸賢遭竄斥者相繼召用三聘祿不及終不自言嘉熙間特贈三官直龍圖閣賜諡忠節同上

按曾三聘三復之弟其為新淦人史傳甚明人文紀略正氣錄以為吉水人者皆訛人物志既以為吉水人又

以為峽江人兩處重見者尤訛楊誠齋淳熙薦士錄自朱熹以下凡六十人曾三復三聘兄弟與焉

陳琦字擇之清江人乾道進士初主衡陽簿辯雪冤獄賑荒柳桂糴無躪籍民甚德之後為丞相留正辟主管機宜文字在蜀二年事無鉅細多資焉卒于官琦為人明敏縝密雖嚴而恕能文善古律有克齋集藏於家

林志

韋楫字濟川清江人學極該博乾道五年乙科對策餘二萬言知寧化縣倅房陵遷知宜州所至剖決無滯獄祖有田廬悉以讓兄時清江上流有桐塘陂坑受大江之衝壞民田二千頃楫按故法為築隄防水五都之壤皆為上腴人

物志

按韋楫明一統志林志以為常楫未詳孰是



張洽字元德清江人從朱熹學自六經傳註而下皆究其旨歸至於諸史百家山經地志老子浮屠之說無所不讀時行社倉法洽請於縣貸常平米二百石建倉里中六年而歸其本於官鄉人利之嘉定元年中第授松滋尉改袁州司理參軍有盜黠甚辭不能折會有兄弟爭財者洽諭之曰訟於官祇為胥吏之地且冒法以求勝孰與各守分以全手足之愛乎辭意懇切訟者感悟盜聞之自伏民有殺人賄其子焚之居數年事敗洽治其獄無狀俄夢有人拜于庭示以傷痕在脅翌日委官上其事果然知永新縣一日謁告聞獄中有哭聲蓋獄吏受財乘間訊囚使誣服也洽大怒亟執付獄以薦通判池時天大旱禱不應洽言于守請蠲征稅催科以召和氣守為寬稅三日果大雨以病

請祠素甫提點江東刑獄以白鹿書院廢弛聘洽為長端平初除直祕閣主管建康崇禧觀以疾乞致仕卒年七十七平居不異常人至義所當為則勇不可奪居閒不言朝廷事或因災變輒顰蹙不樂及聞一君子進用士大夫直言朝廷得失則喜見顏色所著書有春秋集注續通鑑長編事略歷代郡縣地理沿革表文集

宋史

按人物志張洽謚文憲史傳失載

朱景文字元成清江人自幼讀書過目不忘經史百氏蒐獵該貫為文立就雄贍豪爽如其人登乾道進士調筠州司戶後調分宜簿未赴而卒

林志

按朱景文所著有批鱗藁五十篇文集十卷

劉誠之字子開少力學有大志乾道進士歷官州縣卓有政



績嘗為吏部郎後出提舉浙東常平除直祕閣知平江府  
平反冤獄人以比錢若水云弟性之字子仁登乙科為廣  
東經略司幹官時蠻獠猖獗性之奉帥檄督捕直擣峒穴  
擒其酋長後為荆湖制置司參議官擢知峽州秩滿陞監  
察御史終太府丞奉祠 人物志

蔡浩然字養正清江人乾道進士為兩郡博士興學育才郡  
臺皆器之改知安化邑抵溪峒素號難治視篆未幾去猾  
吏抑豪強溪峒悉安用薦授南安通判以疾奉祠去 同上

曾三英三聘弟嘗考三國六朝攻守事迹著南北邊籌八十  
卷又著蒙史 林志

曾三異字無疑三聘弟少有詩名淳熙貢於鄉朝臣以遺逸  
薦召為祕省校勘辭再召奏事除大社令力求去號雲巢

先生作墨戲為世所稱著新舊官制通考通釋等書 人物志

徐筠字國堅得之長子早歲擢第初主攸縣簿後知金州乞  
免本州和糴郡人刻石記其事又肖像以祀嘗為漢官考  
四卷其餘若周禮微言姓氏源流等書皆藏于家 林志

趙希循字良叔慶元進士嘗以漢書七論受知於真西山樓  
攻媿監進奏院以疾辭時相惜其去慰勞甚勤後知汀州  
除直祕閣奉祠有會心錄 同上

蕭翦字則山新喻人紹定進士以史館校勘遷武學博士進  
太府丞求補外遂奉祠得肆力于文字碑銘記序得盤詰  
體工篆隸凡名勝扁額多其所書尤善吟咏有大山集弟  
泰來字陽山登紹定第累擢監察御史有小山集 同上



王選字少登清江人嘉熙進士授零陵簿東安盜起奉帥檄督捕盜平特差湖北帥幹尋改知醴陵生平力學飭行遠近師之人物志

按王選所著有草窗文集

王札字季朋起家門蔭歷沿江制閩幕以能擢守竟陵時襄陽失守郡當要衝兩被重圍竭力固守人皆効死卒完城轉朝請郎以母老奉祠同上

陳茂濂字孟溪新淦人淳祐進士主新昌簿定版籍理稅畝邑黠吏有以賄恃勢誣邑屬者以法籍其家邑中肅然調郴州司理會文天祥領鎮湖南檄為憲幕天祥移贛州濂攝幹官護視司事累官至從政郎歸老于鄉林志

傅實之字莊父清江人登寶慶第調分宜簿時祖母蕭氏壽

百有八歲母楊氏亦八十餘蕭卒以嫡孫承重不赴官弟謙之字溫父開禧甲子以春秋首選當陞對亦以母老不赴兄弟怡怡承歡一室文行為鄉里所推學者以南齋西齋先生稱之太守名其地為慶壽里後以薦召言事獻八箴十事俱稱旨授承事郎所著有春秋幼學記南齋記同上

孔鑑字規祖臨江人少刻苦精於詞賦中年崇尚理學與修江李燔余宗傑為友每為一集質疑辨難剖晰精微後學宗之同上

徐卿孫字麟仲清江人景定進士才猷穎捷由善化主簿歷官左正言薦李芾文天祥可共患難卒如其言同上

黃昶字希宋清江人少孤力學自奮早以能賦稱郡博士以



其經明行修延入學宮為後進楷範累舉對策入高等調  
高安簿時高安邑壯事繁令多分委予奪民德之後歸老  
於家所著有德菴類彙三卷詩彙二十卷集錄十卷同上  
黎立武字以常新喻人咸淳進士授隆興判官歲饑同僚請  
籍富戶賑貧民謂殺一牛以活萬蟻立武駁之曰萬蟻固  
可憐一牛何罪而死衆稱善乃止累遷國子司業文華閣  
待制考試臨川得草廬吳澄時稱其知人其學宗白雲郭  
氏人物志

按黎立武行歷詳吳草廬集元中子碑文稱其年二十  
六擢進士第三人大父母父母具存明年奉四親之官  
一時以為榮累官至國子司業而宋亡傳中庸之學于  
新喻謝尚書平生著述積彙如山演釋舊聞敷暢新得

有圖有贊有講議諸篇悉鈔諸本今其書無一傳者

西江志卷第七十三



西江志卷第七十四

人物九

臨江府二

元

范梈字德機清江人家貧早孤母熊氏守志不他適長而教  
 之梈天資穎異所誦讀輒記憶耽詩工文用力精深人罕  
 知者年三十六始客京師有聲諸公間中丞董士選延之  
 家塾以朝臣薦為翰林院編修官秩滿御史臺擢海南海  
 北道廉訪司照磨巡歷遐僻不憚風波瘴癘遷江西湖東  
 長吏素稱嚴明於僚屬中獨敬異之選充翰林供奉御史  
 臺又改擢福建閩海道知事未幾移疾歸故里授湖南嶺  
 北道廉訪司經歷以養親辭是歲母喪明年以疾卒年五



西江志 卷之十四  
十九所著詩文多傳於世吳澄以道學自任少許可嘗曰  
若亨父可謂特立獨行之士矣為文志其墓以東漢諸君  
子擬之元史

按范德機工篆隸楷書尤長於詩時稱虞楊范揭所著  
東坊集二十卷張伯雨題云一編尚有東坊字慚愧詩  
中見大巫

黃圭羅志仁圭字唐佐志仁字壽可宋末同領鄉薦元初有  
詩名以薦圭授莆田丞志仁授天長書院山長廬陵劉辰  
翁嘗稱之曰黃西月五言羅秋壺小詞他人莫能及也  
人物志

按林志二人訛入宋今改定

晏壽先字仁效新喻人大德間為蒙山錫場提舉調武昌令

歲澇先白憲府免徵改揚州營田建議以歲賦責成有司  
改德昌路總管府判府志

黃贊字子敬臨江人其父君道延祐間求官京師泛遼海為  
富商平章馬某家永平以女妻之初君道有二子一女留  
江西贊既長思慕其父一旦稟命於母走永平則父死三  
年家僅亦亡矣庶母聞其至棄所生兒於市盡挾其貲以  
嫁人贊號哭取幼弟勺乳於鄰姬哺之出入必親抱負然  
莫有指其父葬處者贊日泣以語人曰吾苟見庶母告以  
父墳所在死不恨遺財秋毫無所計且徧愬於官府久之  
真定賈惟貞出守永平贊往愬焉守愴然哀之至正十一  
年聞庶母匿開元海濱亟裹糧求之堅拒不見贊哭其門  
三日扳父老愬之不獲已強其弟偕至永平屬縣之樂亭



掘地丈餘無所見中夜禱於神明既倦就寐夢一老叟須  
眉皓白杖而前指葬處曰得片輒乃葬處也言訖不見明  
日掘地丈餘果有輒庶母之弟曰此其處矣殮時有某物  
為驗啓朽棺殮時物具在贊濯骨灑水負之而歸守與前  
奎章學士北平李訥及僚佐下吏皆贈贖之說學齋集  
按黃贊林志人物志俱不載今采危太朴所撰黃孝子  
傳增入危太朴曰唐元和間趙來章求其父於柳州無  
能知其葬處神具告之贊之事適似之嗚呼誠孝之動  
於鬼神若是可不慎哉

傳若金字與礪新喻人少負刻勵於學能文章受業范梈之  
門甫三十遊京師虞集見其詩大稱賞之元統三年介使  
安南乘傳至真定遽思之曰安南自陳曰烜絕王封朝廷

降詔止稱世子今不然是無故王之也還白中書更之至  
安南館姬侍郤之曰吾曹非陶穀曷為以此見汙使還授  
廣州教授卒同上

簡正理字西碧新喻人以薦授御史臺歷知班改太常奉禮  
除石城尉歷永興新野桃源令居官廉介以儒術飭吏治  
時譽翕然卒年五十同上

皮縉字昭德清江人以父南雄總管廕補邵陽丞考滿歸田  
二十餘年朝命三召始起判平江路少受業於吳草廬之  
門其行也草廬作序送之稱其博覽記工談論為儒羣之  
騏驥吏治之鸞鳳云吳文正公集

按皮縉人物志不載林志稍略今據吳草廬集補撰同  
時有皮野字季賢亦清江人草廬為作詩序



龔翊字舜咨新淦人弱冠喪父卓然能自樹立母亡結廬墓側初其叔與其父同立門戶父既終奉叔如父叔亡恭順其兄兄亡又收植其孤程鉅夫書龔坊表其閭嘗授天全招討司經歷不赴所居名慶原別墅讀書通古今爲詩句律穩安集名桃源漁唱同上

按龔翊林志豫章書郡縣志俱不載今從吳草廬集采補林志載有趙孟玖者割股愈母疾有司以篤孝旌門然不詳何縣人

徐基字仕崇清江人得之裔早有才名草廬吳澄示以爲學之方元統間薦爲書院山長所著有玲瓏窗吟卷林志

周自強字剛善臨江路新喻州人以文法推擇爲吏泰定間廣西洞猺反自強往見猺酋說以禍福中其要害猺酋立

爲罷兵納款請命事聞特旨超授廣西兩江道宣慰司都事轉饒州路經歷遷義烏縣尹周知民情而性度寬厚不爲刻深民有以爭訟訴於庭者一見即能知其曲直未加刑責必反覆開譬之令其悔悟首實則原其罪若怙惡不悛然後繩之以法不少貸民畏且愛獄訟頓息民間田稅之籍多失實差徭不平自強出令履畝覈之文簿井井可攷於是賦役平均貧富樂業政治大行部使者數以廉能舉於朝江路總管致仕元史

杜本字伯原清江人博學善屬文江浙行省丞相忽刺木得其所上採荒策大奇之力薦於武宗召至京師未幾歸隱武尼山中文宗在江南時聞其名及即位以幣徵之不起至正三年右丞相脫脫以隱士薦召爲翰林待制奉議大



夫兼國史院編修官使者致君相意趣之行至杭州稱疾固辭本湛靜寡欲無疾言遽色與人交尤篤於義有貧無以養親無資以為學者皆濟之平居書冊未嘗釋手天文地理律曆度數靡不通究尤工於篆隸所著有四經表義六書通編學者稱為清碧先生卒年七十有五

元史

按杜本事詳見危太朴所撰杜徵君墓碑所著詩名清江碧嶂集此外尚有史原曆原律原韻原文正聲韻類等書

張理字仲純清江人舉茂材異等泰寧儒學教諭勉齋書院山長進福建儒學副提舉有易象圖說貢師泰序其書以傳季子定洪武間以貢授行人奉使西蜀以清謹稱

人物志

裴夢霆字應祥清江人性孤潔嘗築室南郊儲書數千卷扁曰原南草堂日與郡人彭聲之楊仲弘輩講學賦詩時稱三鳳至正進士授江浙儒學副提舉未行壬辰兵變議集義兵備禦未幾卒

同上

劉永之字仲修清江人少隨父宦遊能文詞至正間與楊伯謙等講論風雅當世宗之明洪武初徵至金陵以重聽辭歸性好書篆楷行草皆有法因自號山陰道士所著有山陰集

石門集

按劉永之林志人物志俱不載今采梁孟敬所撰詩序補入

彭鏞字聲之清江人龜年七世孫工詩與郡人楊士弘輩結社虞集見而奇之謂臨江詩道之盛他郡莫比性嗜酒號



清江酒民所著有蕙櫨藁

林志

劉天祐清江人隸軍籍元末紅巾賊起所過燔劫天祐陰結好義者合謀復城賊聞其名捕之急天祐與黨趨新淦州舊無城樹柵自固朝夕與賊戰柵下相持踰十月糧盡突圍出賊追至江家墟馬陷於淖賊兵圍之天祐手刃數十人為賊所執罵不絕口而死

同上

孔會心新淦人武仲八世孫至元間官安慶教授守城城破不屈赴水死

同上

劉應樞清江人為全州學正秩滿歸值壬辰之亂舉義兵為

賊所殺

同上

陳文彬清江人尹興國至正戊戌偽漢既陷贛遣兵窺興國文彬初莅事率民固守凡再却之城以全癸卯乃為保障

計繕墉堞浚城隍疏水環焉門有五舊無甕城至是始備葺文廟講堂置尊經閣興文講學民不知為喪亂之世

劉槎翁集

明

黃惟弘字士能新喻人元季鄉貢士上猶教諭壬辰兵起惟弘間道謁明太祖於洪州授江西行省郎中從大將軍鄧愈征贛道卒

人物志

練伯尚新淦人工詩洪武初為起居注直言忤旨謫廣德州同知遷汀州通判改鎮安卒於官

明史藁

按伯尚即遜國忠臣子寧之父名山藏及明史練子寧傳皆稱其父伯尚而不署名考之明一統志及林志伯尚名僖朱竹垞明詩綜所載有練高無練僖爵里皆同



今從史傳虞道園王子充二公集中俱有練伯尚詩序  
胡行簡字居敬新喻人元至正進士國子助教歷翰林修撰  
江南道御史洪武初徵至京與修禮書賜幣歸應召入京  
上憫其老賜帛遣之 人物志

按王忠文集中樗隱記爲胡居敬而作以爲清江人與  
此不同

趙壘字伯友新喻人元至正中舉於鄉爲上猶教諭洪武二  
年將修元史命左丞相李善長爲監修官前起居注宋濂  
漳州府通判王禕爲總裁官徵山林遺逸之士汪克寬胡  
翰宋僖陶凱陳基曾魯高啓趙汭張文海徐尊生黃篋傅  
恕王錡傅著謝徽爲纂修官壘與焉開局天界寺取元經  
世大典諸書用資參考書成諸儒竝賜賚遣歸而順帝一

朝史猶未備乃命歐陽佑等往北平采其遺事還朝詔重  
開史局仍以宋濂王禕爲總裁徵四方文學士十四人爲  
纂修十四人者壘及朱右貝瓊朱廉王彝張益兼高遜志  
李懋李汶張宣張簡杜寅殷弼俞寅也先後纂修三十人  
兩局竝與者壘一人而已閱六月書成諸儒多授官惟壘  
及朱右朱廉不受歸尋召修日曆授翰林編修高麗遣使  
朝貢賜宴樂作使者以國喪辭壘進曰小國之喪不廢大  
國之禮太祖甚悅命與宋濂同職史館濂兄事之出爲靖  
江王府長史卒 明史藁

曾魯字得之新淦人年七歲能暗誦五經奉禮郎簡正理欲  
以神童舉於朝其父不聽稍長日取三史記之尋及其餘  
凡數千年制度沿革無不能言者遂以文學聞於時洪武



初召爲纂修元史官吏成賜金帛以魯居首乞還山會開局編類禮書復留時議禮者蠶起魯衆中揚言曰某禮宜據某說則是從某說則非有辨詰者必歷舉傳記以告尋授禮部主事開平王常遇春薨高麗王遣使來祭魯欲觀其文使者靳不與魯固欲觀使者不得已出之外襲金龍黃帕文不署洪武年號魯讓曰龍帕誤耳納貢稱藩而不奉正朔君臣義安在使者謝過命易去乃已安南陳叔明篡其主日燈位懼討遣使入貢以覘朝廷意主客曹已受其表魯取副封視之白尚書詰使者曰前王日燈今何驟更名使者不敢諱具言其實帝曰烏尼乃狡獪如此耶卻其貢不受由是器重魯嘗問丞相魯今何官對曰主事耳即日超六階拜中順大夫禮部侍郎未幾命主京畿鄉試

甘露降鍾山羣臣爭以詩應制魯獨進賦帝命侍臣取諸作更番誦之獨歎魯文整核是冬引疾歸未抵家卒淳安徐尊生嘗曰南京有博學士二人以舌爲筆者曾得之以筆爲舌者宋景濂也魯所作不留藁其徒間有所輯錄亦未成書云同上

按峽江縣嘉靖甲申自新淦分設明初尚無此縣名人物志遽以曾魯爲峽江人者非也今依明史餘倣此又按曾在史館宋潛溪稱其補苴罅漏功最多旣爲贊像又志其墓世所傳有曾約齋集即史傳所云其徒輯錄未成書者也

張美和名九韶以字行清江人元末累舉不仕洪武三年以薦爲縣學教諭遷國子助教改翰林院編修致仕歸帝親



爲文賜之復與錢宰等竝徵書成遣還聶鉉者字器之美和同邑人以洪武進士爲廣宗丞疏免旱災稅秩滿入覲獻南都賦及洪武聖德詩授翰林待制改國子助教遷典籍與美和同賜歸十八年復召典會試欲留用之乞便地自養令食廬陵教諭俸終其身時稱成均三助謂鉉與美和及嘉興貝瓊也 同上

按明史張美和與聶鉉合載錢宰傳後皆清江人林志及人物志取張而遺聶今據史傳補錄

王選新喻人洪武初舉明經大理評事永樂中與修五經四書性理大全 人物志

金固字守正新淦人四歲母授五言詩能誦之旣長遂通經史百家之言與同郡梁寅劉永之輩爲友郡太守知其賢

聘爲學訓導講明道德性命之旨士子翕然歸之稱雪崖

先生子幼孜官大學士別有傳 同上

黃槩字體方新淦人洪武中稱十才子後徵至京爲周王府伴讀取古詩數萬篇求其渾然天成之句錄爲一帙而附以已作命曰詩海珊瑚其自製五言如風月雙清夜乾坤萬里秋移舟秋水渡載酒夕陽亭磐石中流坐青山夾岸看七言如野田青處麥千頃楊柳綠邊人幾家山頭一夕風雨過門外雙溪春水生皆有風致可誦 同上

王友仁字仲義清江人明程朱氏易兼工詩文爲人端恪不急於進取所居名思齊齋 梁石門集

梁寅字孟敬新喻人世業農家貧自力於學淹貫五經百氏累舉不第辟集慶路儒學訓導居二歲以親老辭歸隱居



教授太祖徵天下名儒修述禮樂寅就徵已六十餘矣時以禮律制誥分爲三局寅在禮局中討論精審諸儒皆推服書成賜金幣將授官以老病辭還結廬石門山四方多士從學稱爲梁五經又稱石門先生

明史藁

按洪武中詔用明經科取士江西省臣禮聘寅主文衡者三所得皆實學之士生平著述石門集而外經學則有周易參攷春秋攻義尚書纂義禮記輯畧詩經演義周禮考注史學則有策要史斷歷代叙畧雜著則有耄言論林類訓輯訓菟古集格物編等書不下數千卷今傳者惟石門集二卷已爾

張敬字子儀新淦人洪武鄉貢莆田縣學教諭深心古學名重一時國子祭酒吳溥雅重之遣子與弼遊其門累官南

京國子博士卒贈南京刑部員外郎所著有五經膚見四書訓註等書子魁數各有傳

人物志

周慎字仲瑾新喻人洪武鄉貢業成均貼黃內府太祖一見奇其貌明日召拜御史不三年陞僉都御史時廣西奉議龍州土官王世鐵梗化命征南將軍楊副將軍韓討之慎與蕭玉成隨軍紀錄蠻獠平立奉議南丹二衛鎮之多出慎謀奏凱還勞賜金帛命掌院事卒於京

同上

徐敬字敬仲清江人洪武中以國子生授監察御史直言不回兩黜爲令一謫戍邊載歷春坊始終一節及守太平寬猛相濟水旱禱輒應秩滿民懇留之詔加三品俸掌府事以母老乞終養歸

林志

胡器字士璉新淦人貢升太學授雲南普安府通判擢泉州



知府綽有惠政每判死刑恒鬱鬱不樂或問其故曰吾為民父母不能化民以德政乃致民死地耶倉庫火風猛眾莫能措器稽首火尋滅永樂初與修書內閣陞貴州按察使尋召為國子祭酒兼攝通政事致仕歸

人物志

按胡器所著有樸菴集

胡雲端字騰霄新淦人胡忠簡公裔也洪武初以貢舉聘修元史後廷試第一官禮部儀制司主事定禮儀議嫡庶升降服編孝慈錄稱旨遷浙江副使以疾乞歸子子持仕至河南按察司僉事正統初為督學有聲從子子泰吏部文選司主事

同上

陳永言新淦人洪武末由給事中出知惠安縣螟蝻生永言禱於城隍有頃鳩鵠蔽天羣啄食之歲乃獲

同上

周魯章字文瞻新喻人通左氏春秋洪武末以明經徵授文選主事辭以疾上賜篋笠俾歸教民稼穡因號明農隱逸

林志

傅孟素新喻人洪武中舉明經以親老辭歸郡守欲辟為掾笑曰昔以母老辭官今豈能為吏耶不就子玉良玉潤同登永樂十年進士玉良觀刑部政有孫姓者驅車入城碾女子死法司擬抵命玉良力爭以為初無殺人之意竟得減論授常熟知縣玉潤政和知縣以伉直免官

人物志

吳嘉靜新淦人通詩書二經洪武末薦授訓導累官刑部員外郎永樂中與修五經四書性理諸書大全

林志

傅舟字子楫清江人洪武末鄉貢士蘄州學正永樂中與修五經四書性理大全

同上



練子寧名安以字行新淦人少英邁不羣與金幼孜友善曰子異日必爲良臣我必爲忠臣無相負也洪武十八年廷試一甲第二授翰林院修撰歷遷副都御史工部侍郎建文初與方孝孺特見信用改吏部左侍郎拜御史大夫燕師起李景隆北征屢敗召還子寧從朝中執數其罪請誅之不聽燕師既渡淮靖江府直史蕭用道衡府紀善周是修上書論大計指斥用事者書下廷臣議用事者盛氣以詬二人子寧曰國事至此尚不能容言者耶詬者愧而止燕王即位執子寧至語不遜命斷其舌曰吾欲效周公輔成王耳子寧手探舌血大書殿輒曰成王安在血入於輒滌之不滅遂磔之族其家媼戚逮死者百五十一人戍邊者三百七十一人子寧死時侍婢抱一歲兒匿民間得免

萬曆間練綺者兒六世孫也或曰妾秦有娠生子戍所名善慶云女瓊瓊入浣衣局宣德元年赦赦歸適儒生子寧從子大亨官嘉定知縣聞變同妻沈劉家河死妾將產匿民家生子易姓侯遂爲嘉定人里人徐子權洪武十八年進士爲刑部主事聞子寧死慟哭賦詩自經死子寧善文章方孝孺稱其多學而文弘治中王佐刻其遺文曰金川玉屑集提學副使李夢陽立金川書院祀子寧父子名其堂曰浩然福王時贈子寧太保都御史謚忠貞子權光祿卿謚忠愨

明史彙

謝子襄名袞以字行新淦人建文中由薦舉授青田知縣永樂七年與錢塘知縣黃信中開化知縣夏升竝九載課最當遷其部相率訴於上官乞再任上官以聞帝嘉之即擢



子襄處州知府信中杭州升衢州俾得治其故縣子襄治處州聲績益著郡有虎患歲旱蝗禱於神大雨二日蝗盡死虎亦遁去有盜竊官鈔子襄檄城隍神盜方閱鈔密室忽疾風捲墮市中盜即伏罪叛卒吳米據山谷爲亂朝廷發兵討之一郡洶洶子襄力止軍毋出而自以計掩捕之獲其魁餘悉解散歷官三十年不以家累自隨同上金幼孜名善以字行新淦人建文進士授戶科給事中成祖即位改翰林院檢討與解縉等同直文淵閣遷侍講進春秋要旨三卷遷諭德兼侍講七年從幸北京八年北征上重幼孜文學所過山川要害輒命記之有敕旨屬幼孜等據鞍起草立就帝嘗輕騎逐利幼孜請從帝曰戰非爾事也乃止自後北征皆扈從十二年遷翰林學士尋拜文淵

閣大學士二十二年幼孜與楊榮從北征次開平帝曰朕夢神人語上帝好生者再是何祥也榮幼孜請班師帝然之即命草詔諭諸部還軍至榆木川帝崩軍中戒嚴祕不發喪榮南訃幼孜留行在以待太孫至仁宗即位拜戶部右侍郎兼文淵閣大學士尋加太子少保兼武英殿大學士專典內制賜繩愆糾繆銀章諭政有關失密疏聞用此識洪熙改元遷禮部尚書大學士如故命與士奇榮會讞法司囚幼孜善律法多平反既乞還省母母卒起復爲總裁官修兩朝實錄宣德六年卒贈少保謚文靖同上按金幼孜所著有文靖公集十卷子昭伯所編前後北征錄不與焉

杜觀字公儼清江人嘗痛其父早世作思嚴堂以示不忘廬



陵曾祭同郡金善俱有文記之永樂元年以春秋領鄉薦任太平府儒學教授與修五經四書性理大全

人物志

張徹字玉瑩新淦人永樂進士改翰林庶吉士累官吏部考功郎中性剛介時稱為鐵板張謝病歸二十餘年唯閉戶讀書所著有退軒集

同上

孫郁字勝文清江人永樂間以監胄與選風憲官御試高等除刑科給事中奏讞疑獄數十人駕將北征當扈從以營寮友喪失班坐謫桂陽州判在桂兩暘應禱怪石倚江為險祈雷震之如響民立祠祀之陞雲南五井鹽課提舉致仕歸家居督耕而食自號歸耕叟壽百歲卒

府志

黎恬字潛輝清江人天性孝友儀度端凝永樂進士授陝西道監察御史會求直言恬疏詆大臣不法權要側目出知

交趾南靈州尋以楊士奇薦擢諭德與修宣宗實錄進講經筵以展墓歸卒所著有觀過藁

人物志

陳孟浩新淦人少貧刻志於學永樂進士長沙儒學教授改蘇州俗尚浮靡約令敦實周文襄忱禮重之秩滿疏留加秩仍掌學政引年歸

同上

習嘉言名經以字行新喻人永樂進士改翰林庶吉士授編修與修經世大典通鑑直解宣德改元命修兩朝實錄及君臣故事正統初與修宣廟實錄遷侍講擢太常少卿轉詹事府詹事沈毅莊靖為上所眷重卒諭祭葬

同上

按習嘉言所著有尋樂集二十卷

盧滋字玉潤新淦人邑掾滿歲莅事選部尚書蹇義奉命擇天下郡守召滋與議奏上稱旨成祖詰之義以滋與議對



授文選司主事進員外郎出知杭州府會宦者違禁織造  
龍服滋劾之論死留杭十八年遷廣東布政卒

林志

胡器字季楠新淦人永樂進士監察御史按江淮斷疑獄數  
十民爲之語曰刑不及膚德入於心詔嘉之未拜命卒

府志

按明初新淦有兩胡器

劉翔字虛谷清江人宣德鄉貢衡山縣儒學教諭遷國子學  
錄景泰初上中興詩及神禹成功洪範九疇二雅請立宗  
廟以準古七廟制事下禮部憲皇登極再疏宜建七廟各  
具樂章郊祀視學慶成皆當作雅樂革元舊製上召至文  
淵閣命與大學士李賢議翔曰禮樂百年可興茲其時矣  
事竟寢成化間致仕

林志

張固字公正新喻人宣德進士刑科給事中遷大理寺少卿  
出鎮四川會山東饑盜起命往賑之英宗復辟固已卒追  
念諫止北征忠蓋遣行人劉恕諭祭蔭一孫子黼字良伯  
景泰進士監察御史有直聲歷官廣西按察使

人物志

傅瀚字曰川新喻人天順進士選庶吉士除檢討遷諭德直  
講東宮孝宗嗣位擢太常少卿歷禮部左右侍郎尋命入  
東閣專典誥敕兼掌詹事府事弘治十三年代徐瓊爲禮  
部尚書保定獻白鵲疏斥之陝西巡撫熊翀以鄠縣民所  
得白玉璽來獻色微青文曰受命於天旣壽永昌背有螭  
紐翀等以爲秦璽復出瀚率同列言秦璽完毀具載簡冊  
今所進璽篆紐皆不類蓋後人做爲之且帝王受命在德  
不在璽太祖制六璽列聖相承百三十餘載天休滋至受



命之符不在秦璽明矣請姑藏內府帝是其言薄賞得璽者京師星變地震雨雹四方多變異瀚請躬行節儉以先天下光祿寺通行戶物價至四萬餘兩瀚言由供億之濫願敦儉素俾冗費不生十四年卒贈太子太保謚文穆

史藁

明

張敷字廷學新淦人正統間鄉試授監察御史歷仕兩朝奏進律解比例軍政條例俱准行遼地素艱水相地鑿井得泉民德之立祠祀焉按浙嚴溺女之禁遷廣西副使因忤權貴歸休

人物志

盧秩字崇績新淦人景泰進士監察御史遷湖廣副使會廣西徭賊劫掠郴桂勒兵出其不意破之旬日平事聞遷貴

州按察使

同上

何衷字惟孝新淦人天順進士刑部主事進員外郎會四川巡撫都御史與鎮守總兵訐奏廷議推衷往訊比至懼罪者賂千金斥之卒正其罪中都留守咎人死按治久不決衷訊之伏誅遷南京大理右寺丞

林志

吳匯字會川新喻人家貧力學常取松明代膏火學者多師之景泰辛未會試第一官至國子司業

同上

胡榮字希仁新喻人自少游心理學景泰進士歷給事中兩督浙江廣東學校以叅政致仕所著有道器圖東洲藁

同上

周謨字守謨新淦人爲庠生時嘗推廩祿以遜其友天順進士累官陝西副使以母老乞歸邊民番夷老幼相泣不忍舍所著有樂臯集

同上



何純字惟一新淦人成化進士授庶吉士改監察御史時大臣有不厭望者純疏其過三上不報尋陞雲南副使兵備臨安先是阿彌州賊刁蕃叛交人遂侵河純捕斬蕃建議置千戶所巡檢司守禦會有欲增臨安銀課者純奏鑛少民貧課不宜增皆從之同上

孫治字五美清江人成化進士知臨淮縣守已愛民興學作士時權閹汪直陳廣以選妃責貢繼至所在需索動以千計治持正不阿竟為二宦所中改安東遂棄官歸同上

戴中字師中新淦人成化進士宰黃梅有異政召為御史按河南值水荒賑活百萬言事忤旨謫判雅州弘治初起山東僉事遷兵備副使人物志

蕭子鵬字宜冲新淦人居家以孝友稱師事吳康齋與陳白

沙張東白友善弘治元年徵遺逸銓部欲授有司懇辭乃補嘉興府儒學訓導所著有雪丘集林志

何善字惟吉新淦人成化進士新城知縣邑素苦水暴氾禾善令築隄防濬溝渠水不為患歲侵賑粟不待報吏難之吐曰民苟活吾何避罪擢刑部主事同上

熊正字正已清江人成化間貢入太學永淳知縣秀邑富民有毆殺一家三人者獄久不決事下永淳按正核實獄成上下服其明允人物志

彭綱字性仁清江人成化進士授兵部武選司主事遷員外郎上封事劾妖僧繼曉出知汝州鑿渠引水灌田數千畝世為民利擢僉事遷河南雲南提學副使以公明稱為人端凝樸茂後進多程式之同上



按彭綱所著有雲田集

孫仁字偉德新淦人成化進士歷官刑部郎中審錄湖湘多平反出守常州忤中官王敬逮繫詔獄都御史王恕疏仁寃詔寘敬於法累遷河南左布政使會河決爲患蘭陽諸邑仁設方修築賑濟已而決張濟又決張秋與侍郎劉大夏同濬治以功進左副都御史巡撫寧夏疏請富民輸粟權鹽以足儲餉邊鄙賴之休歸疾終遣官祭葬同上

鄧槩字冠卿新淦人成化進士令永安遷都察院都事劾內監韋興謫知資陽陞瓊州同知會都御史劉大夏征黎命槩守臨臯賊不敢犯擢廣東僉事劉瑾專權罷歸府志

敖毓元字化潛登進士第成化中星隕求直言毓元上疏四事慎選大臣慎選臺諫佛老當去名器宜公時李孜省僧

繼曉輩用事毓元語多指斥疏入謫雲南臨西丞孝宗登極起知桂陽竟以直坐事卒人物志

陳壽字本仁新淦人成化進士以都給事中陞大理寺丞累官南京副都御史南京科劾逆瑾被逮壽抗疏救諸言官瑾怒奪職以薦起巡撫延綏火篩犯境以捍禦功遷南京兵部侍郎九上疏乞休陞南京刑部尚書致仕居官不治產業旣罷無所歸僑寓金陵以壽終林志

何正字立經新淦人弘治進士大理評事遷寺副會隆平侯爭襲事下正按於是逆監瑾陰有所左正不從竟罷歸瑾誅起爲河南僉事平河洛寇擢山西副使乞疾詔進按察使致仕人物志

陳陽字健夫新淦人弘治進士改庶吉士授刑部主事奉命



西漢志 卷之十四  
謝獄南畿有持千金陰祈未減者陽拒之竟置於理進郎  
中蘇常有獄久不決命陽往按逆瑾受賕欲貸之弗從  
遂誣下詔獄杖於朝門左謫雲南昆明州同知瑾誅陞廣  
西僉事以劾監司不法左遷運同卒於官 林志

符觀新喻人弘治進士授深陽知縣種蔬解旁掘地得金報  
所部易粟賑饑陞辰州同知改作黔陽淑浦辰溪三學陞  
廣西兵備僉事歷浙江山東參議請老歸 人物志

黃繡字文卿清江人弘治進士授兵部主事駐劄山海關儲  
兵飭備有裨邊政陞員外郎尋陞山東僉事歷副使參政  
督修闕里文廟宸濠之變王守仁舉勤王師知繡魁壘多  
智聘至軍中計事年六十五卒 同上

張芹字文林新淦人弘治進士授福州推官擢南道御史彈

劾無所避逆瑾誅疏論輔臣比瑾者名振天下陞徽州知  
府察民便宜務與休息嘗捐俸并郡中引價金置六邑義  
田備荒民呼其田曰廉惠田官至布政使乞休家居 同上  
孫偉字朝望清江人弘治進士授南京工部主事陞郎中上  
疏言時事十六條詞甚剴切守鶴慶會土官高才怙勢煽  
亂偉索之急才計窮悔禍乃止解仕歸居家孝友待宗族  
無論疎戚樂施予尤推引後學云 同上

涂禎新淦人成化進士初為江陰知縣正德初巡鹽長蘆劉  
瑾命其黨畢貞託取海物侵奪商利禎據法裁之還朝遇  
瑾止長揖瑾怒矯旨下詔獄江陰人在都下者謀斂錢賂  
瑾解之禎喟然曰死耳豈汙父老哉竟勿許遂杖三十永  
戍肅州創重死獄中瑾怒未息取其子樸補伍瑾誅樸乃



西江志 卷之十四  
還禎復官賜祭 明史藁

按涂禎事明史藁附周璽傳後林志失載今補入

敖英字子發號東谷清江人正德進士授南工部主事遷祠部郎出督陝西河南歷仕藩臬所至聲望著聞以四川右布政使致仕英在當時盛有詩名人稱之為敖清江自為督學慨然以力崇師道興起文教為任正色盛氣人不敢干以私惟與羅洪先鄒守益善講學相資獎掖後進里居十餘年著述日富有綠雪亭心遠堂等集 人物志

胡璉字重器 一作美 新喻人正德進士官刑部嘗諫武宗南巡

受杖尋卒穆宗嗣位贈太常少卿 明史藁

張文字堯冕新淦人天資篤實與餘干胡敬齋辨論甚多如太極辨性善等說皆出獨見所著有易經五贊解四書發

明西洲藁 林志

按同時有兩張文其一為新喻人弘治癸丑進士在垣中多所建白林志人物志皆不載

聶仕字本學清江人正德鄉貢漳州府通判平海劇寇所獲金帛悉籍於官視郡篆反風滅火禱雨濟旱以父喪感疾卒 人物志

謝階字立升新淦人正德中除行人選御史彈劾無所避陞大理知府民病取石伐大樹塞其谷再守建寧致仕卒年八十八 同上

聶璜字鳴卿清江人正德鄉貢授常德通判監司愛其材事有大且難者檄使佐理再補黃州平寇羅田有功陞順德同知三月即引疾致仕家居十餘年郡中稱長者 同上



千顯偲新淦人六歲失怙踰年求父像時拜且哭家貧事母能盡養比葬廬墓所虎馴其側正德三年旌表子鳳弘治鄉薦知桃源縣卒官

林志

黃流新淦人早喪父其母患噎疾醫弗効日夜禱神求以身代一日母忽思米果鄰家偶有餽食之即愈流往謝鄰言初無是餽人以為孝感淦之言孝行者以千黃竝稱

同上

簡霄字騰芳新喻人正德進士授石首令歷官大理丞平反有聲擢僉都御史巡撫河南進南京副都提督操江陞兵部右侍郎奉命護慈孝獻皇后南祔顯陵尋乞歸卒所著有蓉溪集

府志

簡佐字臣心新喻人少有神童之日年十二冠多士御史何公召賦清風樓大奇之正德中舉進士官至同鄉以建言

左遷長史

同上

龔亨字有孚清江人正德進士授刑部主事擢僉憲貴州時蜀中番部攻剽轉掠黔中當事議撫亨曰番人無信不一創撫不可圖也遂率衆深入箐峒蕩平之備兵臨安地鄰交趾多盜擒渠魁斬首六人邊境晏如丁內艱補廣東副使歷秦楚二藩擢巡撫河南歲饑檄諸路發粟全活數萬人奏減河夫積負尋解官歸杜門謝客以文章自娛臨卒自為志狀

人物志

黃仁山字元靜新淦人正德進士授刑科給事世宗冲齡承大統宦官黃玉趙綱居中用事凡大政悉就咨決仁山首發其姦狀戚畹陳萬言嘗規造私第欲借各邊銀二十萬兩已奉俞旨復上疏中引竇霍奢僭欲其恬淡自全時論



壯之會大禮議起上意欲尊崇興獻王廷臣互相甲乙仁  
山專主大學士楊廷和議欲如漢定陶王宋濮安懿王故  
事出爲嚴州守未幾謫丞西安遷西安令太倉知州改馬  
湖同知乞休卒

同上

吳達字近光新淦人嘉靖進士授兵部主事以母老告改南  
疏魏國公翫法害民數事詔奪魏職陞興化知府單車入  
郡歷三載篋無秋毫陞四川副使兵備達州與御史忤遂  
歸

同上

按吳達事詳見羅念菴所撰墓志中

蕭文明字時化新喻人嘉靖間鄉貢初授五河知縣邑苦河  
患捐俸遷築城垣改昌平知縣邊警至文明督軍民戰且  
守城得不破調嵩明解任歸學問究性命所著有二程粹

言象山語畧南中錄

府志

敖璠字貴之新喻人嘉靖進士授刑部主事歷郎中恤刑兩  
浙多平反陞兵備副使整飭蘇松會有海寇躬率義兵亟  
捕剿之撫臣上功有金帛之錫任山東叅政踰年卒

同上

傅鶚字文瑞新喻人登進士歷官御史巡按湖廣以風力見  
稱坐與大學士嚴嵩忤疏乞終養

人物志

王貴字道充清江人嘉靖鄉薦少從學王陽明湛甘泉授湖  
州府同知陞南刑部主事轉鹽運司同知致仕卒

同上

蕭鳴邦字子和清江人由鄉薦任東昌府通判轉開封同知  
皆營河道會九廟工起荆蜀巨材阻於水請俟水開以濟  
詔從之逆賊師尚詔擾河南奉檄守太康身冒矢石卒完  
其城遷工部郎中轉雲南僉事平武定土酋之亂致仕歸



曾樂字思韶新淦人嘉靖鄉薦授南雄府推官署東莞多惠政癸卯分校省試首拔倫文叙時稱知人守賓州招降劇寇臺使上其功入爲工部員外郎以疾乞休

人物志

高翀字允升峽江人嘉靖丙戌進士歷捷爲溧水東鹿三縣令入爲工部員外郎擢浙江叅議藩臬巡撫貴州以征苗功進階工部尚書致仕

府志

按嘉靖以後置峽江縣始稱峽江人

杜欽德字子敬清江人嘉靖舉人從呂涇野黃久菴講學金陵任兩淮運判建五港閘復安東舊屯商民便之尋知雅州茶商歲苦天全六番爲暴檄招討司嚴番禁歲饑民賴賑活者衆立祠祀焉

人物志

饒思聰字子聞新淦人嘉靖進士由司理擢刑部主事歷官福建布政使卒於家思聰少負將略喜譚邊事與中丞曾銑齊名歷仕藩牧十餘年三殲巨寇再疏漕河屢詔優賜

鈔幣

同上

蕭克良字以達新淦人由鄉薦爲汶上令先是兗諸邑多寇盜克良悉捕置之法邑民韓克儒等七人爲大賈讐搆繫獄一訊立白其冤秩滿請告歸辛酉流寇逼淦城悉散家財結死士擊走之淦賴以安

府志

朱瓚字克獻新淦人嘉靖鄉薦性孝友兄弟皆早卒撫其子如已出由睢寧諭補武昌令調麻陽苗賊入寇遠近大震瓚集父老諭之曰苗歲爲麻陽害今乘我新至亡備當出不意擊之民皆鼓勇先登俘斬百餘級苗遂宵遁以積勞



西江志 卷之十四  
三  
遘疾卒

同上

張緒字卿理峽江人嘉靖進士授翰林檢討嚴嵩方為宰執雅慕緒名緒卒不詣其門出為湖廣叅政提督太和山緒不欲與寺人伍疏請中官治山事分守理民事獲允著為令尋以副使備兵貴州安宣慰負固日久諭以大義安感泣願立功自贖時苗寇猖獗緒遂遣將合安眾破之平霸威清諸處多虎患為文禱於廟俄虎自相搏噬死在黔數年功績茂著卒以嵩故被論歸

人物志

熊逵字子漸清江人嘉靖進士授刑部主事歷官廣東廉使會粵寇張璉僭號逵條陳兵食大計卒獲成功遷浙江布政使浙方多事帑藏空虛乃剔貪冒清逋負籌畫有方適胡撫敗眾慮客兵為變逵大發芻粟犒之反側以定

同上

劉松字汝貞新喻人嘉靖進士官刑部郎中時徐學詩劾宰臣嚴嵩專擅疏藁出松手嚴頗銜之以忌引歸年甫三十隆慶中郡守管大勳同修郡志所著有羅川遺藁

同上

饒鳳詔字應宣弟鳳儀字應禎新淦人少以友愛稱鳳詔尤刻意古學以貢入南雍領嘉靖鄉薦弟鳳儀亦省試獲雋

御史建坊榮之

同上

黃元成號梅塘峽江人嘉靖鄉薦署曲江諭陞武康令會大饑廩且竭元成請於上自署其牘有云嬰兒啼飢不飽不止慈母愛子亦怒亦憐當事竒其語遂得賑

府志

曾廣翰清江人由明經授岑縣令猺獞相率歸化以憂去再補大埔縣追回各縣侵田以千計遷廣州府通判督餉平番有功進階致仕

同上



彭惟享字子成清江人龜年之後少有才譽舉嘉靖鄉試授  
嚴州司理不事擊斷每論囚輒反覆以求其生擢兵部職  
方郎巡閱禁旅備禦悉中機宜以勞卒於官 同上

邊毅字德弘號南岡峽江人嘉靖進士為台州推官擢南臺  
御史疏論時政屢忤權貴或諷以少遜言益力一日宰臣  
嚴嵩自出慰勞臺臣欲啖以無言謂毅曰君何靠曰某靠  
天時京師有靠天邊南岡之謠坐忤出守湖州再謫判廣  
德補宣城令稍遷大理評事轉刑部郎卒 人物志

劉正亨字謙夫新淦人由舉人署浦江諭轉興寧知縣會猺  
狃出沒剽掠擒其渠帥楊子常餘黨悉定調贛榆陞河池  
知州俗濱苗男女無別正亨修學校明禮教苗俗化之遷  
温州同知禦倭有功郡守陰中之左遷吉府長史 同上

楊暈清江人以貢授平海衛學訓導仕終吉府教授親歿嘗  
作噬臍錄以志思慕環堵蕭然言動以古人為法有四書  
讀法五經辨疑諸書學者稱之 府志

徐雲程字允升清江人嘉靖進士授禮部主事隆慶改元大  
禮多出裁定出僉憲河南陞浙江按察使嘗築麗水隄民  
賴其利解散金衢礦徒以持法忤直指遂乞終養 同上

晏仕翹字應望清江人嘉靖進士松江府推官時華亭徐階  
為首輔有司過其門者輒下車晏持不可擢監察御史有  
薛運使者恃江陵嬖黨貪橫疏劾之坐忤出為郡尋謫滁  
州判官陞知太倉州卒 人物志

鄧以和字履之新喻人嘉靖鄉貢為海南知州洗剔巨姦特  
建水陸二營倭不敢入寇政績著聞陞寧國府同知以忤



分宜子致政歸 同上

按人物志及府志以張春傳列於鄧以和之後春乃嚴  
嵩義子也嵩敗後坐其黨被論者魏謙吉劉伯躍等十  
餘人太僕丞張春與焉春嘗官翰林侍讀以被劾改官  
明史至與鄧懋卿同傳此而混列於人物不幾公論滅  
絕耶舊志之不足徵如此今削去

周安叔字于盤新淦人以明經司訓台州轉蘇州府教授教  
士分經義時務二科人以比胡安定冢宰陸汴給諫王亮  
御史黃鍾徐申輩皆所獎拔尋擢銅仁司李時值饑荒土  
司煽亂至即撫定之孫一松辛未進士以文名 府志

朱璉字文卿新淦人登進士為崇安令治行循卓召拜御史  
巡視長蘆鹽課巡按湖廣秩滿轉南畿督學使稱得人尋

陞副使歸 同上

胡叔廉字明發新淦人嘉靖進士為臨海令會颶風民多死  
暴骨海濱叔廉悉掩而祭之便宜發倉躬詣災傷諸處賑  
給全活甚眾築海堤易瀉鹵為膏腴民生祀之擢刑科給  
事中轉兵科有邊將坐事賄權貴營脫行千金於叔廉卻  
之又嘗籌畫西北邊事謂當備薊州諸處疏上後悉如其  
言陞應天府丞轉大理寺正卿以疾乞休 同上

楊標字廷瞻清江人嘉靖進士授行人遷御史巡按廣東會  
海寇平中官陳洪思冒邊功蔭襲論沮之累遷應天府丞  
以事外補轉浙江副使直營兵為亂單騎入其營底定之  
改廣東叅議平劉青山之亂以功進雲南叅政卒 人物志  
錢天挺字子松清江人隆慶中由明經授邵武通判丁艱補



亳州同知監修高家堰委濬黃河以勞績著稱奉命賑濟定遠天長諸縣泗壽和三州撫輯流移舉卓異遷化州知州未赴卒 同上

朱孟震字秉器新淦人隆慶進士任南雍歷南北部郎出守重慶卻黔中接濟餉千餘緡時稱廉介擢潼關兵備副使分守冀南值歲歉發廩施粥以活流移及春民間種穀俱盡出俸錢市粟給之遷四川按察使蜀人歲苦採辦請於臺使奏罷三之一詔賜金帛加二品俸轉貴州左轄宣慰安國亨素獷悍為邊患數以餽餌謝弗受示以威信國亨大懼入為順天尹巡撫山西再靖巖疆以疾請告歸 同上

按朱孟震所著有郁木生全集汾上續談浣水續談黃學字以行新淦人萬曆鄉薦汝州同知遷常德府同知常

德為水陸衝郡產大木郡丞故攝權事會有增稅之命諸商惶怖學力請於臺使得酌減者十之七視篆桃源武陵二縣威惠竝著蠻人不敢為寇御史上其功數被褒異秩滿冢臣孫丕揚欲以監司薦學聞力辭之乞歸 同上

聶尚恒字惟貞新淦人父素貴潛心理學尚恒隨父任太倉訓萬曆中以鄉薦為廬陵諭陞撫寧令邑故臨邊尚恒悉力防禦城賴以全革巡邊酒席卻貂客販參常例錢廉能著聞仕終寧化令 同上

蕭以裕字守弘清江人由鄉貢授宜都令宜都貧民沿江以砂金為生會開採令下中使橫索欲沒淘沙戶千家蕭力請於臺司得免秩滿遷惠州同知擢知廣西府討平江外東山二番陞山東長蘆運使致仕 同上



彭而珩字韞白清江人由進士爲汀州司理署郡事有廉稱擢南臺御史巡視下江戊子歲大侵疏請蠲賑復奏請江楚二省改折俱報可視屯政以贖緩千餘入社倉備賑轉海南憲副以母老不行子元祚亦進士同上

黃之俊字君籲清江人萬曆進士除海鹽令政尚清簡會海

塘傾圯邑幾沼之俊躬自督築七月而成丁內艱服除遂

不仕府志

熊鏞字華卿清江人萬曆進士授刑部主事恤刑山東著讞

疑錄轉員外郎會科臣有言倭事和議不便狀忤旨下部

鞫鏞力爲申救同官皆得罪左遷南大理評事泰昌改元

卹贈光祿寺丞同上

簡懋爵新喻人萬曆鄉薦累官惠州知府先是同知真定時

魏璫用事同官咸欲爲璫立祠簡不肯鐫名其黨遂誣侵漁撫賞遣緹騎逮問臨行作詩自分必死至南京璫敗還調韶州歎曰吾老矣安能折腰竟解綬歸後魏黨復以撫賞中之逮至京其子寬搥登聞鼓白寃放歸卒人物志

聶心湯字純中新淦人由進士授錢塘令建虎林書院以崇

正學淪西湖水漑三郡田遷工部主事轉營繕司郎中時

少府舉訕中貴多盤據爲姦力清耗蠹省金錢數十萬擢

廣西兵備命未下淮撫李三才以盜木占厰諸不法事下

所司按驗湯持之益力坐與黨人忤罷歸補趙州知州復

與魏黨私人有隙削籍崇禎初起知滁州以病不克赴同

上

祝耀祖字述卿清江人萬曆進士初令崑山以最聞拜工科



給事中彈劾無所避嘗發白養粹姦狀後果敗會邊警戒  
嚴耀祖揭榜禁門稽察宿衛上取榜入覽喜曰巡視正宜  
爾尋以忌外補終按察司僉事

府志

黃一鳳字時鳴峽江人由進士授刑部郎中出爲平陽知府  
未赴卒生平博覽典籍尤研精理學事繼母以孝聞在刑  
曹多決疑獄家無餘財時人推其廉介

同上

黎祖壽字收溢清江人萬曆進士爲南刑部主事以外艱歸  
服闋補北工部時水衡金錢久爲中貴窟穴會郊祀肇舉  
諸費猝然倚辦姦商市賈率營求中官支領冒破祖壽條  
陳摘發疏上羣閹持之未幾楊左被逮人言籍籍祖壽屹  
不爲動崇禎改元起吏部考功郎杜抑僥倖再參媚璫二  
十人以勞疾卒於官

人物志

饒思鄒字克紹新淦人幼孤隨母守節外家以明經歷羅田  
諭令新寧反徭獍侵田數千畝政績多可紀述

府志

張堯文號復吾新淦人萬曆進士爲涇縣令擢南武選主事  
歷職方員外郎時倭寇告警樞臣議汰舊兵以增新兵人  
心譁動堯文條上利害羣議帖息出守池州以憂去補衢  
州守衢有銅山內監劉忠奉旨開採頗擾民堯文每事裁  
抑酌定稅額中貴爲之斂手轉臨江副使稅官馬堂殘剝  
商賈陰折辱其左右堂曰是嘗厄劉內侍者遂避去尋奉  
檄治河建八議卒用其言以有成

人物志

程達字順甫清江人萬曆進士授崑山令崑山莊家區田千  
頃民困逋賦率他徙達親詣其處相蓄洩築隄二百餘里  
遂稱樂土號程公堤再調仁和擢御史巡按廣東首疏中



官張鯨不法事外戚鄭氏冒領度支錢二萬緡達復上疏  
論列直聲震中外以忌出守泉州陞兵備副使尋秉臬憲  
歷浙江貴州布政使加太僕卿致仕 同上

熊化字仲龍清江人萬曆進士授行人司冊封蜀藩再奉命  
使朝鮮賜一品服朝鮮人好其文翰曰得熊君片紙勝十  
斛明珠也使回贈遺一無所受臨別王使其相獻名馬至  
關以書歸之尋擢御史疏論輔臣方從哲誤國不報左遷  
淮陽副使投劾歸 同上

嚴君教字玉雲新喻人由鄉舉授潯州司理辭稅務不私其  
利以卓異知麻哈州州舊無學宮諸生寄肄於府嚴爲立  
學復請增置弟子員後陞鎮江同知卒 府志

盧汝鵬字子羽新淦人天啓鄉薦歷德安諭知開化縣歲饑

發倉廩賑救全活數萬人山賊李子成等攻剽遂樂諸邑  
逼開化汝鵬設法擒剿三邑皆得全擢知和州以最遷工  
部員外郎未赴卒 同上

簡欽文字其敬新喻人天啓進士授泉州推官擢吏部郎時  
魏瑞煽虐欽文守政不阿丁內艱歸尋補文選司郎中未  
赴卒 同上

曾櫻字仲含峽江人萬曆進士授工部主事歷郎中遷常州  
知府諸御史巡鹽倉江漕及提學屯田者皆操舉劾權文  
牒日至櫻牒南京都察院曰他方守令奔命一巡按獨南  
畿奔命數巡按請一切戒飭罷鈎訪取贖諸陋習都御史  
熊明遇爲申約束焉織造中官李實劾罷巡撫周起元迫  
知府行屬禮櫻獨如故實怒移檄以爾汝侮之櫻亦報以



爾汝卒不屈高攀龍繆昌期李應昇被逮櫻助昌期應昇資而經紀攀龍死後事出其子及僮僕於獄宜與毛士龍坐忤魏忠賢遣戍櫻諷士龍逃去上官捕其家人賴櫻以免武進孫慎行忤忠賢當戍櫻緩其行忠賢事敗遂解七年遷浙江右叅政用士民請詔以新秩留任崇禎元年以右叅政分守漳南九蓮山賊犯上杭櫻募壯士擊退之夜搗其巢殲馘殆盡東廠獲一男子言爲櫻行賄謀遷浙江按察使帝怒命撫按械櫻赴京士民以櫻貧爲釀金辦裝者老數千人隨至闕下擊登聞鼓訟寃帝命毋入獄俟命京邸以故官巡視海道未行楊嗣昌以衡永多寇奏改櫻湖廣按察使分守湖南時賊已殘十餘州縣而永州知府推官咸不任職櫻薦蘇州同知晏日曙歸德推官萬元吉

才兩人方坐事罷官以櫻言命日曙以同知掌知府事元吉以檢校掌推官事一方遂安遷山東右布政使十四年春擢右副都御史明年遷南京工部右侍郎乞假歸山東初被兵巡撫王永吉所部濟兗東三府州縣盡失匿不以聞及兵退以恢復報而櫻所部青登萊三府失州縣無幾盡以實奏及論罪永吉反擢兵部侍郎總督薊遼而櫻奪官逮治下刑部獄不十日而京師陷賊盡釋諸囚櫻乃微服遁還自詣南京刑部時福王已立法司當以贖徒唐王稱號於福州鄭芝龍專柄薦櫻起工部尚書兼東閣大學士無何令掌吏部櫻持法不撓數有所執爭薦揭重熙傳鼎銓等皆擢用王駐延平令櫻留守福州

大兵破福州櫻挈家避海外中左衛越五年自縊死

明史藁



張茂頤字元貞新喻人萬曆庚子與父啓宗同舉於鄉登天啓進士授工部主事督易州山廠具疏題改炭價商困以甦會銓司員缺當補魏璫用事惡茂頤不出其門轉虞衡郎出爲高涼叅政海寇李魁奇犯電白禦卻之轉浙江副使卒貧無以殮邑人晏日啓官浙率屬治其喪以歸

人物志

胡志傳字子肖峽江人萬曆鄉薦署分宜諭丁艱補長山諭擢馬湖推官會闖賊由潼關薄會城奉檄署睢州甫至葺三蘇祠築城簡卒竝有方略賊舟至城下志傳率兵迎戰賊敗去解圍御史上其功以勞瘁請休卒

同上

張叔鏜字振卿新淦人天啓進士初令秀水潔已勤職清蠹摘姦一時號爲神君時魏璫煽權聞叔鏜名欲得之以自

重卻謝不通贊遂忤其意降寧國府教授後璫敗陞國子助教子壽祺同榜進士官南道御史

同上

張問士字達可峽江人天啓貢入南雍崇禎中舉賢良方正授知縣問士上疏有聖主殷憂已極舉世聳聵自如臣忠憤迫切義不顧私願乞殘邑以酬國恩以倡忠義之語遂授北流令至縣繕城郭修武備寇至身先行間殲其渠帥邑賴以安御史奏其才遷壽州守卒

同上

曾植字季培峽江人入南雍學士黃道周以賢才薦授泉州海防同知泉濱海番舶鱗集例供餽數千金悉卻不受尤善決獄七邑中告理者皆詣之有武弁秦士匪犯法將刑奇其貌釋之後有寇過仙遊僭稱王植奉命督兵討之至則相率乞降乃知僭號者即士匪也以功陞叅議尋召爲



光祿少卿不赴歸

同上

郭裕字謀貽清江人崇禎十四年由舉人授棗陽縣甫任事張獻忠兵至左良玉屯近邑裕單騎邀與共禦賊卻去十五年冬李自成長驅犯襄陽良玉先奔賊將劉福來攻棗陽裕發砲石擊傷實多賊憤攻益力城陷裕身被數槊大罵賊支解之闔門遇害

明史藁

按郭裕明史藁無專傳附見陳美傳中

曾曰琥字白卿清江人崇禎恩貢初授興國州倅治漕有績陞楚雄別駕提舉黑鹽井擢叙州郡丞叙州苗蠻綴屬土司岨梗不法曰琥諭誠申飭山峒革面向化時流賊犯川督師會剿以軍功加川南僉事卒

府志

萬發祥名養正以字行新喻人性孝友積學力行以古人自

期崇禎進士改庶吉士甲戌闖賊陷京師發祥聞變即絕粒飲藥不死聞馬世奇吳麟徵殉節往哭之被執賊脅之降榜掠亡完膚又臨以刃令赴市不為動會賊敗去發祥間關南旋寓居吉州

人物志

按國變錄萬發祥姓名在受刑人數中與此合據殷頑錄丙戌贛州城破發祥與楊萬諸人同時殉節與此不同兩存以俟再攷

楊廷麟字伯祥清江人崇禎進士授編修與黃道周善十年冬皇太子將出閣簡充講官兼直經筵廷麟力讓道周不許明年二月帝御經筵問保舉考選何者為得人廷麟言保舉當嚴舉主如唐世濟王維章乃溫體仁王應熊所薦今二臣皆敗而舉主無恙是連坐之法先不行於大臣欲



收保舉劾得乎帝爲動色時楊嗣昌主和議冀紓外患廷  
麟痛詆之嗣昌大恚詭薦廷麟知兵帝即召見改兵部職  
方主事贊畫象昇軍象昇得之甚喜即令往真定轉餉濟  
師及象昇戰死賈莊廷麟報軍中曲折嗣昌擬旨責以欺  
罔及事平欲中以危法帝察其無罪貶秩調外而已黃道  
周獄起詞連廷麟逮治未至而道周已釋言者多薦廷麟  
復授職方主事未赴都城失守廷麟慟哭募兵勤王會福  
王立用御史祁彪佳薦召爲左庶子辭不就宗室朱統鑣  
誣劾大學士姜曰廣并誣廷麟召健兒有不軌謀以曰廣  
爲內應王不問然竟散所募兵順治二年南都破江西諸  
郡所存者惟贛州唐王手書加廷麟吏部右侍郎劉同升  
國子祭酒乃偕巡撫李永茂集士大夫於明倫堂勸輸兵

餉九月

大兵屯泰和副將徐必達戰大敗廷麟自督師與同升乘虛  
復吉安臨江十月

大兵攻吉安必達戰敗赴水死會廣東援兵至

大兵屯峽江已而萬元吉至贛十二月同升卒三年正月廷

麟赴贛招峒蠻張安等四營降之以元吉代守吉安三月

廷麟聞王將赴贛往朝之甫行以吉安警留屯城外日馳

疏陳援吉防贛事宜亡何吉安復失元吉退保贛州四月

大兵逼城下贛圍急廷麟遣使調廣西狼兵而身往雩都趣

新軍來救五月望戰梅林再敗退保雩都廷麟乃散其兵

以六月入贛與元吉憑城守未幾援兵至圍暫解已復合

廷麟等分門拒守至八月水師戰敗援師悉潰時被圍已



西江志 卷七十四  
半年守陴者悉懈十月四日

大兵登城廷麟急督士民拒戰久之力不支廷麟走西城投

水死 明史藁

國朝

邊勲字子猷峽江人少為諸生從施閏章講學於吉州康熙

壬子以春秋舉於鄉謁選得江南太平縣未任休致生平

質直言行一出於至誠手不釋卷尤熟於史所著有集蓼

山房詩草古文雜著四卷 府冊

西江志卷第七十四



